

舊

唐

書

一



百衲本二十四史

舊唐書

四部叢刊史部

上海涵芬樓影印常
熟瞿氏鐵琴銅劍樓
藏宋刊本闕卷以明
聞人詮覆宋本配補

刻舊唐書叙

書以紀事謏聞爲贖事以著代間逸則遺是故史之
書與天地相爲始終六經相爲表裡疑信並傳闕文不
飾以紀事實以昭世代故六經道明萬世宗仰非徒文
藝之誇誕而已也尚書壁存典訓不斲魯史麟絕杞宋
失徵繼而有作其惟司馬氏及小司馬以迨班范諸家
八書十志經緯天人八志十典紘維政事藏山刊石繁
紹聖經歷漢躋隋炳發靈憲是故王教之要國典之源
代有徵考若覩著蔡李唐嗣興萬目畢舉其經畫之精
詳維持之愼密雖未上躡周軌亦足並驟漢疆晉史臣

劉昫氏者爰集館寮博稽載典纂脩二十一本紀首高祖以迄哀帝而汶哲具昭旁脩十一志始禮儀以終刑法而巨細畢舉列傳一千一百八十有奇內以紀后妃之淑慝外以悉文武之臧否宗室族屬互以時叙外戚宦官各以類別良吏酷吏鑒戒具昭忠義孝友褒論悉當儒學文苑表以著達方伎隱逸兼以察微詳傳列女以彰婦順分傳蠻狄以立大防卷凡二百一十有四統名之曰唐書識博學宏才優義正真有唐一代之良史秦隋以下罕有其儷固後世之刑鑒具在也有宋迭興分職書局載輯唐鑑於祖禹繼纂唐書於昌朝王宋諸

賢相繼彙輯復成一代之新書遂亡劉氏之舊帙詮謬
司文學徧歷輔畿爰校六經兼讎諸史始知漢晉以迄
宋元皆有監本司成甬川張公嘗奉

旨校勘總爲二十一史刊證謬訛粲然明備惟劉氏唐書
鬱絕不傳無所考覓積集再期酷志刊復苦無善本莫
可繼志竊惟古人有云層臺雲構所缺過乎榱桷爲山
霞高不終踰乎一壠憫哉斯言益用惶怵乃旁謀學屬
博訪諸司間禮儒賢以探往籍更歷三載竟莫有成末
復弭節姑蘇窮搜力索吳令朱子遂得列傳於光祿張
氏長洲賀子隨得紀志於守溪公遺籍俱出宋時模板

旬月之間二美璧合古訓有獲私喜無涯乃督同蘇庠
嚴爲校刻司訓沈子獨肩斯任効勤四載書幸成編匱
直千金刻未竟業石江歐陽公聞而助以厚鎰午山馮
子西郭陳子以迨郡邑諸長貳咸力輔以終事數百年
之闕典於是乎始有可稽矣物之成毀信各有數是書
之成夫豈偶哉肇工於嘉靖乙未卒刻於嘉靖戊戌珠
璣璀璨亥豕盡刊玉薤精嚴塵葉罔翳煥新—代之舊
文遐續百王之訓典追配諸史允備全書因布多方以
惠多士餘姚聞人詮叙

舊唐書重鏤紀勛序

李唐氏有天下三百年三代而降英君明辟若唐文皇
功德固在首列厥後子孫迭興雖中更喪亂猶不失為
盛朝而玄憲二宗至配貞觀與漢七廟同稱何也其典
章灋度貽謀之善不可及已蓋作唐史者有三人焉吳
兢常述令狐垣此皆金閨上彥操筆石渠而未竟一代
至石晉朝始敕中書劉昫等因垣舊文增為百九十卷
然後有唐事跡悉載無遺而撰述詳贍妙極模寫足以
上追史漢下包魏陳信乎史之良者無以加于是矣柰
何宋之慶曆又出新編大有增損至使讀者不復得觀

唐朝一詔令歷年五百舊書湮沒君子不能無病諸

皇上右文弘道化被四遠由是縉紳士夫咸以修緝典墳為
已任此書故有刻本在吳中惜亦未全先任提學侍御
北江聞人公聞之慨然欲壽諸梓與菁莪共擇可託者
得蘇學司訓沈君有問學幹局良儒師也因授之俾董
厥事且命廣搜殘逸足其卷數及募士出貲佐經費君
鳩工堂西大舍中無常三十手朱墨讎校不舍晝夜成
未及半而北江公以憂去以貲不紹白之巡撫大中丞
石江歐陽公公命掌郡事別駕鍾侯助其役未幾府主
王侯至任許相以完大巡侍御西郭陳公尤加贊相樂

書之成而其事則總於今任提學侍御午山馮公焉蓋
學政之臺書之所由起也工將畢士子素貞輩相率扣
予請先序諸後予惟三古聖人作為經書人極立矣十
九朝史官述為史書往事鑒矣去聖既遠後儒蠹經經
不可蠹猶雲翳白日日行空自如也史又可以新掩舊
哉且文章之作率視其區宇之全缺鉅唐疆域幅員萬
里其廣大與軒后等是以詞華蔚茂有至光焰萬丈者
郎舍相踵既出螭坳親見又遇劉司徒之博洽乃克成
書其難如此忽有改圖殆不其然今日群公雲萃留神
盛舉蓋匪創則無以始弗繼將莫能終至於中間經畫

唐書序
尤艱其任此殆至寶將出之幸會其數天也偉矣哉惜予耄矣而不能卒業抑不知青雲士能觀以否所謂前朝國勢先賢行事故黎命脉班班具存推之於政古今一也有能舍其新而舊是圖將來挾以為

國家用吾知事業發揮必當煒燁崢嶸勝常而不凡也詎止以資見聞談說而已哉沈君名桐字大材號春波嘉禾望族學通璧經累試場屋知名以超貢入胄監屈就今官其於斯績甚勤且出私帑不之校斯文不墜係其承理之功多也因併及云時在

嘉靖十七年秋仲東吳耄生楊循吉謹序

重刊唐書叙

嘉靖己亥吳郡重刊唐書成書凡二百卷本
紀卷二十志三十列傳百有五十石晉宰相涿
人劉昫撰初御史紹興聞人公詮視學南畿
以是書世無梓本他日按吳遂命郡學訓
導沈桐刊置學宮工未竟而公以憂去及是
書成以書來屬徵明為叙按唐興令狐德棻
等始撰武德貞觀兩朝國史八十卷至吳兢合

前後為書百卷而柳芳韋述嗣緝之趙義寧
訖開元僅三百餘年而于休烈令狐峘以次增
緝訖於建中而止而大曆元和以後則成於崔
龜從厥後韋澳諸人又增緝之凡為書百四十
有六卷而芳等又有唐曆四十卷續曆二十二
篇皆當時記載之言非成書也晉革唐命昀
等始因舊史緒成此書然五代史昀傳不載
此事豈其書出一時史館而昀特以宰相領

其事邪然不可考已或謂五代搶攘文氣
卑弱而是書紀次無法詳略失中不足傳遠宋
慶曆中詔翰林儒臣刊修之自慶曆甲申至
嘉祐庚子歷十有七年成新書二百二十五卷
視舊史削六十一傳增傳三百三十有一續撰儀衛
選舉及兵及藝文四志別撰宰相方鎮及宗
室世系宰相世系四表所謂其事則增於前其
文則省於舊寔當時表奏之語而第賞制詞

亦謂閎博精覈度越諸子良以宋景文歐陽
文忠皆當時大手筆而是書寔更二公之手故
朝野尊信而舊書遂廢不行然議者則以用
字奇澀為失體刊削詔令為太略固不若舊
書之為愈也司馬氏修通鑑悉據舊史而於
新書無取焉惟周益公稱其刪繁為簡變全以
古有合於所謂文省於舊之論而劉元城顧謂
事增文省正新書之失唐庚氏尤深斥之乃

極言舊書之佳其所引決海救熱引鸛止渴之
語豈直工儷而已自是一代名言也然則是書
也其可以無傳乎雖然不能無可議者段秀
實請辭郭晞有吾戴吾頭之語新書省一
吾字議者以為失實是矣而舊史秀實傳
乃都不書夫秀實大節固不以此而此事亦卓
詭可喜柳宗元叙事尤號奇警且鄭重致詞
上於史館若是而不得登載則其所遺亦多矣

甚者詆韓愈文章為紕謬謂順宗實錄繇簡不當拙於取舍異哉豈晁氏所謂多所闕漏是非失實者邪甚矣作史之難也心術有邪正詞理有工拙識見有淺深而史隨以異要在傳信傳著不失其實而已今二書具在其工拙繇簡是非得失莫之有揜焉彼斥新書為亂道誠為過論而或緣此遂廢舊史又豈可哉此聞人公所為梓行之意也是

書嘗刻於越州卷後有教授朱倬名倬忤秦檜出為越州教授當是紹興初年今四百年矣其書復行而公又出於越其事豈偶然哉先是書久不行世無善本沈君僅得舊刻數冊較全書才十之六七於是徧訪藏書之家殘章斷簡悉取以從事校閱惟審一字或數易歷三暑寒乃克就緒其勤誠有足嘉者因附著之是歲三月望前翰林待詔長洲文徵明叙

[illegible]

桐空空鄙夫繆承校史之役寔維

臺憲群公而下後先協謨功乃成其詳已載諸序序所未及者弗敢畧也爰備錄之

惠借藏書

陳沂

應天府人

王延喆

吳縣人

王穀祥

長洲縣人吏部員外郎

張沐

長洲縣人光祿署丞

捐俸助膳

萬夔

江西南昌人長洲知縣

馮汝弼

浙江平湖人常熟知縣

汪旦

福建泉州人吳縣知縣

郭愷

江西泰和人蘇州府學教授

蕭文佐

江西吉安人長洲學教諭

鄧璿

江西人吳縣學訓導

何鍾秀

福建人吳縣學訓導

分番校對

許祺

陳棟

時兆文

王謨

俞文聚

陳模

盧恩

素貞

龔雷

金甬

周雅

姚圭

蔣球王

陳國祥

金表

宋純仁

李堯臣

陸應澤以上俱蘇州府學生

錢江餘姚縣學生

吳岫太李生

出貲經費

曾子修

嚴汝賢

陳讓

陸一陽以上俱國子生

許道蘇州府學生

高本文華亭縣人

嘉靖十八年四月既望蘇州府儒學訓導沈桐識

唐書目錄

本紀卷第一

唐書一

高祖

本紀卷第二

唐書二

太宗上

本紀卷第三

唐書三

太宗下

本紀卷第四

唐書四

高宗上

本紀卷第五

唐書五

高宗下

本紀卷第六

唐書六

則天皇后

本紀卷第七

唐書七

中宗

唐書

本紀卷第八

唐書八

玄宗上

本紀卷第九

唐書九

玄宗下

本紀卷第十

唐書十

肅宗

本紀卷第十一

唐書十一

代宗

本紀卷第十二

唐書十二

德宗上

本紀卷第十三

唐書十三

德宗下

本紀卷第十四

唐書十四

順宗

憲宗上

本紀卷第十五

唐書十五

憲宗下

本紀卷第十六

唐書十六

穆宗

本紀卷第十七上

唐書十七上

敬宗

文宗上

本紀卷第十七下

唐書十七下

文宗下

本紀卷第十八上

唐書十八上

武宗

宣宗上

本紀卷第十八下

唐書十八下

宣宗下

本紀卷第十九上

唐書十九上

懿宗

本紀卷第十九下

唐書十九下

僖宗

本紀卷第二十上

唐書二十上

昭宗

本紀卷第二十下

唐書二十下

哀帝

志卷第一

唐書二十一

禮儀一

志卷第二

唐書二十二

禮儀二

志卷第三

唐書二十三

禮儀三

志卷第四

唐書二十四

禮儀四

志卷第五

唐書二十五

禮儀五

志卷第六

唐書二十六

禮儀六

志卷第七

唐書二十七

禮儀七

志卷第八

唐書二十八

音樂一

志卷第九

唐書二十九

音樂二

志卷第十

唐書三十

音樂三

志卷第十一

唐書三十一

音樂四

志卷第十二

唐書三十二

曆一

志卷第十三

唐書三十三

曆二

志卷第十四

唐書三十四

曆三

志卷第十五

唐書三十五

天文上

志卷第十六

唐書三十六

天文下

志卷第十七

唐書三十七

五行

志卷第十八

唐書三十八

地理一

志卷第十九

唐書三十九

地理二

志卷第二十

唐書四十

地理三

志卷第二十一

唐書四十一

地理四

志卷第二十二

唐書四十二

職官一

志卷第二十三

唐書四十三

職官二

志卷第二十四

唐書四十四

職官三

志卷第二十五

唐書四十五

輿服

志卷第二十六

唐書四十六

經籍上

志卷第二十七

唐書四十七

經籍下

志卷第二十八

唐書四十八

食貨上

志卷第二十九

唐書四十九

食貨下

志卷第三十

唐書五十

刑法

列傳卷第一

唐書五十一

后妃上

高祖太穆皇后竇氏

太宗文德皇后長孫氏

賢妃徐氏

高宗廢后王氏 良娣蕭氏

中宗和思皇后趙氏

中宗韋庶人

上官昭容

睿宗肅明皇后劉氏

睿宗昭成皇后竇氏

玄宗廢后王氏

玄宗貞順皇后武氏

玄宗楊貴妃

列傳卷第二

唐書五十二

后妃下

玄宗元獻皇后楊氏

肅宗張皇后

肅宗韋妃

肅宗章敬皇后吳氏

代宗崔妃

代宗睿貞皇后沈氏

代宗貞懿皇后獨孤氏

德宗昭德皇后王氏

德宗韋妃

順宗莊憲皇后王氏

憲宗懿安皇后郭氏

憲宗孝明皇后鄭氏

女學士尚宮宋氏

穆宗恭僖皇后王氏

敬宗郭貴妃

穆宗貞獻皇后蕭氏

穆宗宣懿皇后韋氏

武宗王賢妃

宣宗元昭皇后晁氏

懿宗惠安皇后王氏

昭宗積善皇后何氏

列傳卷第三

唐書五十三

李密

列傳卷第四

唐書五十四

王世克

竇建德

列傳卷第五

唐書五十五

薛舉子仁果

李軌

劉武周苑君璋附

高開道

劉黑闥徐圓朗

列傳卷第六

唐書五十六

蕭銑

杜伏威闕陵王雄誕

輔公祐

沈法興

李子通

朱榮張善安

林士弘

羅藝

梁師都

劉季貞李子和

列傳卷第七

唐書五十七

裴寂

律師承先

劉文靜

弟文起張平高

文靜子樹藝

李孟嘗

劉世龍

趙文恪

錢九隴

龐卿渾

樊興

李高遷

許世緒

劉師立

列傳卷第八

唐書五十八

唐儉

子觀從心子駿

觀子從心

長孫順德

劉弘基

子仁實

殷嶠

劉政會

柴紹

平陽公主馬三寶附

武士彠

長兄士陵次兄士逸

列傳卷第九

唐書五十九

屈突通

子壽銓子仲翔

少子詮

任瓌

丘和子行恭子神勳

許紹嫡孫力士加士子欽明

李襲志弟襲譽兄子懷儼

姜纂子行本簡弟柔遠行本子簡

簡子瞻皎子慶初

列傳卷第十

唐書六十

宗室太祖諸子代祖諸子

永安王孝基

淮安王神通子道彥孝友

孝察孝節孝同孝義孝慈

襄邑王神符

長平王叔良

襄武王琛

河間王孝恭子晦孝恭弟城瓌

漢陽王瓌附河間王

廬江王瑗王君廓附

淮陽王道玄

江夏王道宗

隴西王博義

列傳卷第十一

唐書六十一

溫大雅子無隱大有

大雅和彥博彥博子振挺

陳叔達

竇威

子憚兄子執
抗子衍靜

執子奉節
靜子達抗季子誕

執弟琮
誕子孝慈

從子抗
孝慈子希玠誕

列傳卷第十二

唐書六十二

李綱

子少植
少植子安仁

鄭善果 從弟元璋

楊恭仁

子思訓
執柔子滔

思訓孫詹交
執柔弟執一

恭仁弟續
恭仁少弟師道
續孫執柔

皇甫無逸

孫忠

李大亮 族孫迥秀

列傳卷第十三

唐書六十三

封倫

子言道
兄子行高

蕭瑀

兄子鈞
鈞兄子嗣業

鈞子權

裴矩

子宣機

宇文士及

列傳卷第十四

唐書六十四

高祖二十二子

隱太子建成

衛王玄霸

巢王元吉

楚王智雲

荆王元景

漢王元昌

鄴王元亨

周王元方

徐王元禮

韓王元嘉

彭王元則

鄭王元懿

霍王元軌

號王鳳

道王元慶

鄧王元裕

舒王元名

魯王靈夔

江王元祥

密王元曉

滕王元嬰

列傳卷第十五

唐書六十五

高士廉

長孫無忌

列傳卷第十六

唐書六十六

房玄齡

杜如晦

列傳卷第十七

唐書六十七

李靖

李勣 孫敬業

列傳卷第十八

唐書六十八

尉遲敬德

秦叔寶

程知節

段志玄

張公謹

列傳卷第十九

唐書六十九

侯君集

張亮

薛萬徹

兄萬鈞
劉世讓

盛彥師
劉蘭

盧祖尚
李君羨附

列傳卷第二十

唐書七十

王珪

戴胄

兄子至德

岑文本

兄子長倩
格輔元附

倩子義

杜正倫

列傳卷第二十一

唐書七十一

魏徵

列傳卷第二十二

唐書七十二

虞世南

李百藥子安期

褚亮

李玄道
李守素附

列傳卷第二十三

唐書七十三

薛收

子元超
從子稷

姚思廉

顏思古

令狐德棻

鄧世隆
李延壽

顧胤
李仁實附

孔穎達

司馬才章
馬嘉運

王恭

列傳卷第二十四

唐書七十四

劉洎

馬周

崔仁師

孫湜
夜子論

湜弟夜

列傳卷第二十五

唐書七十五

蘇世長

子良嗣

韋雲起

孫伏伽

張玄素

列傳卷第二十六

唐書七十六

太宗諸子

恒山王承乾

楚王寬

吳王恪

子成王千里
孫信安王禕

濮王泰

庶人祐

蜀王愔

蔣王暉

越王貞

子鄆王冲

紀王慎

江王囂

代王簡

趙王福

曹王明

列傳卷第二十七

唐書七十七

韋挺

子待價
弟萬石

楊纂

族子弘禮
武子元璋

弘武
元信

劉德威

子審禮

閻立德

弟立本

柳亨

兄子奭
亨孫真澤

崔義玄

子神慶

列傳卷第二十八

唐書七十八

于志寧

玄孫敖

高季輔

張行成

族孫
賜之昌宗

列傳卷第二十九

唐書七十九

祖孝孫

傅仁均

傅奕

李淳風

呂才

列傳卷第三十

唐書八十

褚遂良

韓瑗

來濟

上官儀

列傳卷第三十一

唐書八十一

崔敦禮

盧承慶

劉祥道

李敬玄

李義琰

孫處約

樂彥瑋

趙仁本

列傳卷第三十二

唐書八十二

許敬宗

李義府

列傳卷第三十三

唐書八十三

郭孝恪

張儉

蘇定方

薛仁貴

程務挺

張士貴

趙道興

列傳卷第三十四

唐書八十四

劉仁軌

郝處俊

裴行儉

子光庭

列傳卷第三十五

唐書八十五

唐臨

孫紹

張文瓘

兄文琮

徐有功

列傳卷第三十六

唐書八十六

高宗中宗諸子

燕王忠

原王孝

澤王上金

許王素節

孝敬皇帝弘裴居道附

章懷太子賢子邠王守禮

懿德太子重潤

庶人重福

節愍太子重俊

殤帝重茂

列傳卷第三十七

唐書八十七

裴炎

劉禕之

魏玄同

李昭德

列傳卷第三十八

唐書八十八

韋思謙子承慶

陸元方

蘇瓌子頤

列傳卷第三十九

唐書八十九

狄仁傑孫兼謨

王方慶

姚壽弟珽

列傳卷第四十

唐書九十

王及善

杜景儉

朱敬則

楊再思

李懷遠

子景伯
景伯子彭年

豆盧欽望

張光輔
崔元琮

史弼
周允元

列傳卷第四十一

唐書九十一

栢彥範

敬暉

曾孫元膺

崔元暉

弟昇暉
子璩

張東之

子漪
玄孫璟

袁恕已

曾孫德文

列傳卷第四十二

唐書九十二

魏元忠

韋安石

子陟斌
斌子況
從父兄子抗

從父兄子抗
趙彥昭附

蕭至忠

宗楚客紀處訥

列傳卷第四十三

唐書九十三

婁師德

王孝傑

唐休璟

張仁愿

薛訥

王駿

列傳卷第四十四

唐書九十四

蘇味道

李嶠

崔融

盧藏用

徐彥伯

列傳卷第四十五

唐書九十五

睿宗諸子

讓皇帝憲

惠莊太子撝

惠文太子範

惠宣太子業

隋王隆悌

列傳卷第四十六

唐書九十六

姚崇

宋璟

列傳卷第四十七

唐書九十七

劉幽求

鍾紹京

郭元振

張說子均均
陳希烈附

列傳卷第四十八

唐書九十八

魏知古

盧懷慎

源乾曜

李元紘

杜暹

韓休

裴耀卿

列傳卷第四十九

唐書九十九

崔日用

張嘉貞

蕭嵩

張九齡

李適之

嚴挺之

列傳卷第五十

唐書一百

尹思貞

李傑

解琬

畢構

蘇珣子晉

鄭惟忠

王志愔

盧從愿

李朝隱

裴淮從祖弟寬

王丘

列傳卷第五十一

唐書一百一

李义

薛登

韋湊從子虛心

韓思復孫休

張廷珪

王求禮

辛替否

列傳卷第五十二

唐書一百二

馬懷素

褚无量

劉子玄

徐堅

元行冲

吳兢

韋述

列傳卷第五十三

唐書一百三

鄭虔瓘

郭知運

王君奭

張守珪

牛仙客

王忠嗣

列傳卷第五十四

唐書一百四

高仙芝

封常清

哥舒翰

列傳卷第五十五

唐書一百五

宇文融

韋堅

楊慎矜

王鉷

列傳卷第五十六

唐書一百六

李林甫

子岫

楊國忠

子暄

張晞

王琚

王毛仲

列傳卷第五十七

唐書一百七

玄宗諸子

靖德太子琮

庶人瑛

皇太子亨

棣王琰

庶人瑤鄂王

靖恭太子琬

庶人琚光王

夏悼王一

儀王璿

穎王璩

懷哀王敏

永王璘

壽王瑁

延王玢

盛王琦

濟王環

信王瑑

義王珣

陳王珙

豐王珙

恒王瑱

涼王璿

沐哀王璿

列傳卷第五十八

唐書一百八

韋見素子諤益 益子顗

崔圓

崔渙子縱

杜鴻漸

列傳卷第五十九

唐書一百九

馮盎

阿史那杜爾子道貞仲祖蘇尼失

契苾何力

黑齒常之

李多祚

李嗣業

白孝德

列傳卷第六十

唐書一百十

李光弼

王思禮

鄧景山

辛雲京

列傳卷第六十一

唐書一百十一

崔光遠

房琯子孺復從子式

張鎬

高適

暢瑑

列傳卷第六十二

唐書一百十二

李暉

族弟齊物
暉族弟若水

齊物子復

李麟

李國貞

子鏡

李岍

弟嶧

李巨

子則之

列傳卷第六十三

唐書一百十三

苗晉卿

裴冕

裴遵慶

子向

向子寅

寅子樞

列傳卷第六十四

唐書一百十四

魯炆

裴莪

來瑱

周智光

列傳卷第六十五

唐書一百十五

崔器

趙國珍

崔瓘

敬括

韋元甫

魏少遊

衛伯玉

李承

列傳卷第六十六

唐書一百十六

肅宗代宗諸子

肅宗十二子

代宗二十子

越王係

承天皇帝倓

衛王佖

彭王儼

兗王儻

涇王佹

鄆王榮

襄王儼

杞王倓

召王偲

恭懿太子侶

定王侗

淮陽王倓

昭靖太子選

均王遐

睦王述

丹王逾

恩王連
韓王迥

簡王邁

益王廼

隋王迅

荆王選

蜀王遯

忻王造

韶王暹

嘉王運

端王遇

循王通

恭王通

原王達

雅王逸

列傳卷第六十七

唐書一百十七

嚴武

郭英乂

崔寧

嚴震

嚴礪

列傳卷第六十八

唐書一百十八

元載王昂附

李少良郇謨附

王縉

楊炎

黎幹

劉忠翼附

庾準

列傳卷第六十九

唐書一百十九

楊綰

崔祐甫子值再從兄倭

常袞

列傳卷第七十

唐書一百二十

郭子儀

子曜 晞 綬 曙 晤 映 綬 子 釗 縱

晞子綱

列傳卷第七十一

唐書一百二十一

僕固懷恩

梁崇義

李懷光

列傳卷第七十二

唐書一百二十二

張獻誠

弟獻恭 獻甫 獻恭子煦

路嗣恭

曲環

崔漢衡

楊朝晟

樊澤

李叔明

裴胄

列傳卷第七十三

唐書一百二十三

劉晏

第五琦

班宏

王紹

李巽

列傳卷第七十四

唐書一百二十四

薛嵩子平

令狐彰子建

田神功弟神玉

侯希逸

李正己

子納師道納子師古宗人附

列傳卷第七十五

唐書一百二十五

張鎰馮河清

劉從一

蕭復族子位佩德

柳渾

列傳卷第七十六

唐書一百二十六

李揆

李涵

陳少遊

盧慈

裴諝

列傳卷第七十七

唐書一百二十七

姚令言

張光晟

源休

喬琳

張涉

蔣鎮

洪經綸

彭偃

列傳卷第七十八

唐書一百二十八

段秀實子伯倫

顏真卿子穎頑

列傳卷第七十九

唐書一百二十九

韓滉子曄

張延賞子弘靖弘靖子文規

列傳卷第八十

唐書一百三十

王璵道士李國楨梁鎮奏疏附

李泌子繁顧况附

崔造

關播李元平附

列傳卷第八十一

唐書一百三十一

李勉

李臯子象古道古

列傳卷第八十二

唐書一百三十二

李抱玉

李抱貞

王虔休

盧從史

李芄

李澄族弟元素

列傳卷第八十三

唐書一百三十三

李晟

子愿翽聽憑憲恕甚怙

王佖

列傳卷第八十四

唐書一百三十四

馬燧

子暢燧兄炫

渾瑊

子鎬

列傳卷第八十五

唐書一百三十五

盧杞

子元輔

白志真

裴延齡

韋渠牟

李齊運

李實

韋執誼

王叔文

王伾附

程异

皇甫鏐

弟鏐

列傳卷第八十六

唐書一百三十六

竇叅

從子申

齊映

劉滋

族弟贊

盧邁

崔損

齊抗

列傳卷第八十七

唐書一百三十七

徐浩

趙涓

子博宣附
盧南史附

劉大真

李紆

邵說

于邵

崔元翰

于公異

呂渭

子溫恭儉讓

鄭雲逵

李益

李賀

列傳卷第八十八

唐書一百三十八

趙憬

韋倫

賈耽

姜公輔

列傳卷第八十九

唐書一百三十九

陸贄

列傳卷第九十

唐書一百四十

韋臯劉關附

張建封

盧羣

列傳卷第九十一

唐書一百四十一

田承嗣姪悅

承嗣子緒

田弘正子布牟布牟在宥

張孝忠子茂昭

昭子克勤

弟茂宗

列傳卷第九十二

唐書一百四十二

李寶臣

子惟岳惟誠惟簡惟簡子元本

王武俊子士真士真子承宗

王廷湊

子元逵元逵子紹懿紹懿子景崇

紹懿子紹烈

列傳卷第九十三

唐書一百四十三

李懷仙

朱希彩附

朱滔

劉平

子濟濟弟雍

程日華子懷直懷直子權

李全略

子同捷

列傳卷第九十四

唐書一百四十四

尚可孤

李觀

戴休顏

陽惠元

李元諒

韓游瓌

賈隱林

杜希全

尉遲勝

邢君牙

楊朝晟

張敬則

列傳卷第九十五

唐書一百四十五

劉玄佐

子士寧
李萬榮附
士幹

董晉

陸長源

劉全諒

李忠臣

李希烈陳仙奇附

吳少誠弟少陽
少誠子元濟附

列傳卷第九十六

唐書一百四十六

薛播

鮑防

李自良

李說

嚴綬

蕭昕

杜亞

王緯

李若初

于頔

盧徵

楊憑

鄭元

杜兼

裴玠

薛伾

列傳卷第九十七

唐書一百四十七

杜黃裳子載勝

高郢子定

杜佑從師損式方從郁式方子崇

列傳卷第九十八

唐書一百四十八

裴垍

李吉甫

李藩

權德輿子璩

列傳卷第九十九

唐書一百四十九

于休烈

子肅教子琮

肅子敖

令狐岵

歸崇敬

子登登子融

奚陟

張薦

薦祖文成又新子讀

薦子又新

蔣乂

子係仲

柳登

父芳登子璟

登弟冕

沈傳師

父既濟子詢

列傳卷第一百

唐書一百五十

德宗順宗諸子

舒王誼

通王湛

虔王諒

肅王詳

文敬太子源

資王謙

代王誼

昭王誠

欽王諤

珍王誠

郊王經

均王緯

澈王縱

莒王紆

密王綢

郇王綜

邵王約

宋王結

集王綰

冀王綰

和王綺

衡王綰

欽王績

會王績

福王綰

珍王繕

撫王紘

岳王緄

袁王紳

桂王綸

翼王綽

斷王緝

列傳卷第一百一

唐書一百五十一

高崇文

子承簡

伊慎

朱忠亮

劉昌裔

范希朝

王鐸子稷

閻巨源

孟元陽

趙昌

列傳卷第一百二

唐書一百五十二

馬璘

郝廷玉

王栖曜子茂元

劉昌子士澗

李景略

張萬福

高固

郝玘

段佐

史敬奉野詩良輔附

列傳卷第一百三

唐書一百五十三

姚南仲

劉廼子伯弼孫允章附孫端夫

袁高

段平仲

薛存誠

子廷老保遜子昭緯廷老子保遜

盧坦

列傳卷第一百四

唐書一百五十四

孔巢父從子戡戡戢

許孟容

呂元膺

劉栖楚

張宿

熊望

栢耆

列傳卷第一百五

唐書一百五十五

穆寧

子贊質負賞

崔邠弟邠鄆卿

竇羣

兄常牟弟庠羣

李遜弟建

薛戎弟放

列傳卷第一百六

唐書一百五十六

于頔

子敏季友方

韓弘

子公武弘弟充

李質

王智興

子晏平晏宰

列傳卷第一百七

唐書一百五十七

王翊

兄翊

郗士美

李鄴

子桂桂子礪

辛祕

馬摠

韋弘景

王彥威

列傳卷第一百八

唐書一百五十八

武元衡

從父弟儒衡

鄭餘慶

子澣茂休

澣子允謨
虞誨從謹

韋貴之

兄綬弟纁序

貫之子澳

澳子庚郊附

列傳卷第一百九

唐書一百五十九

衛次公

子洙

鄭絀

子玆德玆顯

韋處厚

崔羣

路隨

父泌

列傳卷第一百十

唐書一百六十

韓愈

張籍

孟郊

唐衢

李翱

宇文籍

劉禹錫

柳宗元

韋辭

列傳卷第一百十一

唐書一百六十一

李光進

弟光顏

烏重胤

王沛

子逢

李琪

李祐

董重質

楊元卿

子延宗

劉悟

子從諫
孫頊

劉沔

石雄

列傳卷第一百十二

唐書一百六十二

潘孟陽

李脩

王遂

曹華

韋綬

鄭權

盧士玟

韓全義

高霞寓

高瑀

崔戎

陸亘

張正甫

子毅夫
毅夫子諱

列傳卷第一百十三

唐書一百六十三

孟簡

胡証

子濃湘

崔元略

子鉉元儒

鉉子沆元式

元略弟元受子鎡

杜元穎

崔弘禮附

李盧仲

王質

盧簡辭

兄簡能弟弘正

簡能子知猷

列傳卷第一百十四

唐書一百六十四

王播

弟炎起龜子蕞

起子龜炎子鐸

李絳

子璋瑱

楊於陵

紹復師復

嗣復

列傳卷第一百十五

唐書一百六十五

韋夏卿

王正雅

族孫凝

柳公綽

子仲郢公綽弟公權

崔玄亮

溫造

子璋

郭承嘏

殷侗

孫盈孫

徐晦

列傳卷第一百十六

唐書一百六十六

元稹

龐巖

白居易

行簡 敏中附

列傳卷第一百十七

唐書一百六十七

趙宗儒

竇易直

李逢吉

段文昌子成式

宋申錫

李程

列傳卷第一百十八

唐書一百六十八

韋溫

蕭祐

獨孤郁弟朗

錢徽子可復可及

高鉞弟銖錯

馮宿弟定審

封敖

列傳卷第一百十九

唐書一百六十九

李訓

鄭注

王涯

王璠

賈餗

舒元興

郭行餘

羅立言

李孝本

列傳卷第一百二十

唐書一百七十

裴度

列傳卷第一百二十一

唐書一百七十一

李渤

張仲方

裴潏

張臯附

李中敏

李甘

高元裕

兄少逸

李漢

李景儉

列傳卷第一百二十二

唐書一百七十二

令狐楚

弟定綱子瀟海楚子緒綱

牛僧孺

子蔚藁蔚子徽

蕭俛

弟傑倣倣子廩從弟倣

李石

弟福

列傳卷第一百二十三

唐書一百七十三

鄭覃

弟朗潜

陳夷行

李紳

吳汝訥

李回

李珣

李固言

列傳卷第一百二十四

唐書一百七十四

李德裕

子燁

列傳卷第一百二十五

唐書一百七十五

憲宗二十五子

穆宗五子

敬宗五子

文宗二子

武宗五子

宣宗十一子

懿宗八子

僖宗二子

昭宗十子

列傳卷第一百二十六

唐書一百七十六

李宗閔

楊嗣復子授損技拭搗

楊虞卿

弟漢公

虞卿從兄汝士

汝士弟魯士知權附

馬植

李讓夷

魏暮

周墀

崔龜從

鄭肅

盧商

列傳卷第一百二十七

唐書一百七十七

崔慎

由父從伯父能

慎由弟安潛

崔珙

兄珙

弟璠璠璵璶璷璸璹

盧鈞

裴休

兄儵

弟休

楊收

兄發

弟嚴

嚴子涉

注

韋保衡

路巖

夏侯孜

子潭

澤

劉瞻

劉瑑

曹確

畢誠

杜審權

子讓能

彥林

劉鄴

豆盧瑑

列傳卷第一百二十八

唐書一百七十八

趙隱

弟隱

光裔

光逢

張楊

子文蔚

濟美

李蔚子渥河澤

崔彥昭

鄭畋子凝績盧溝附

王徽

列傳卷第一百二十九

唐書一百七十九

蕭遘弟遽

孔緯子崇弼

韋昭度

崔昭緯

張濬

朱朴

鄭繁

劉崇望兄崇龜弟崇魯崇謨

徐彥若父商子綰弟彥樞

陸扆

柳璨弟瑊瑒

列傳卷第一百三十

唐書一百八十

朱克融

李載義

楊志誠史元忠附

張仲武子直方

張允伸

張公素

李可舉

李全忠子匡威匡壽

列傳卷第一百三十一

唐書一百八十一

史憲誠

子孝章

何進滔

韓允忠

樂彥禎

羅弘信

子威

列傳卷第一百三十二

唐書一百八十二

王重榮

王處存

弟處直

諸葛爽

高駘

畢師鐸

時溥

朱瑄

弟瑾

列傳卷第一百三十三

唐書一百八十三

外戚

獨孤懷恩

竇德明

姪懷真
希瓘子

族弟孝謙
孝謙子希城

希球

希瑾

長孫敞

武承嗣

子延秀
攸暨

從父弟三思
攸暨妻太平公主

三思子崇訓

從祖弟懿宗
從父弟攸緒

薛懷義

韋溫

王仁皎

子守一

吳敘

弟湊

竇覲

柳晟附

王思敬

子難得子難得子顏

列傳卷第一百三十四

唐書一百八十四

宦官

楊思勗

高力士

袁思藝

李輔國

程元振

魚朝恩

劉希暹

賈明觀

竇文場

霍仙鳴

俱文珍

吐突承璀

王守澄

仇士良

田令孜

楊復光

楊復恭

劉季述

王奉先

韓全誨

列傳卷第一百三十五上

唐書一百八十五上

良吏上

韋仁壽

陳君賓

張允濟

李桐客

李素立

薛大鼎

賈敦頤

弟敦實

李君球

崔知溫

高智周

田仁會

子歸道

韋機

權懷恩

馮元常

蔣儼

王方翼

薛季昶

列傳卷第一百三十五下

唐書一百八十五下

良吏下

裴懷古

張知寒

兄知玄
知晦

楊元琰

倪若水

仲嗣
麟

楊嶠

李濬

姜師度

子麟

潘好禮

宋慶禮

楊瑒

強循

李尚隱

和逢堯

蕭定

楊茂謙

薛珏

崔隱甫

子存慶

呂諲

任迪簡

蔣洸

袁滋

李惠登

閻濟美

范傳正

薛苹

列傳卷第一百三十六上

唐書一百八十六上

酷吏上

來俊臣

周興

傅遊藝

丘神勣

索元禮

侯思止

萬國俊

來子珣

王弘義

郭霸

吉頊

列傳卷第一百三十六下

唐書一百八十六下

酷吏下

姚紹之

周利貞

王旭

吉溫

羅希奭

毛若虛

敬羽

列傳卷第一百三十七上

唐書一百八十七上

忠義上

夏侯端

劉感

常達

羅士信

呂子臧

張道源

族子楚金附

李公逸

張善相

李玄通

敬君弘

馮立

謝叔方

王義方

成三郎

尹元貞

高叡

子仲舒

王同皎

周憬

蘇安恒

俞文俊

王求禮

燕欽融

郎岌附

安金藏

列傳卷第一百三十七下

唐書一百八十七下

忠義下

李澄

張介然

崔無訛

盧奕

蔣清

顏杲卿
袁履謙附

薛愿
龐堅附

張巡
姚閭南霽雲附

許遠

程千里

袁光庭

邵真

符璘

趙曄

石演芬
張名振附

張伾

甄濟

劉敦儒

高沐

賈直言

庾敬休

辛謙

列傳卷第一百三十八

唐書一百八十八

孝友

李知本

張志寬

劉君良

宋興貴

張公藝附

王君操

周智壽許坦

王少玄

弟智爽附

趙弘智

陳集原

元讓

裴敬彝

裴守真

李日知

崔沔

陸南金

弟趙璧

張琬

兄瑄

梁文貞

李處恭呂元簡附

張義貞

崔衍

丁公著

羅讓

列傳卷第一百三十九上

唐書一百八十九上

儒學上

徐文遠

陸德明

曹憲

許淹呂善公孫維附

歐陽詢

子通

朱子奢

張士衡

賈公彥

張後胤

蓋文達

谷那律

蕭德言

許叔牙

子儒附

敬播

劉伯莊

秦景通

羅道琮

列傳卷第一百三十九下

唐書一百八十九下

儒學下

邢文偉

高子貢

郎餘令

路敬淳

王元感

王紹宗

韋叔夏

祝欽明

郭山惲

柳冲

盧粲

尹知章

徐岱

蘇弁

兄家弟冕

陸質

馮伉

韋表微子蟾

許康佐

列傳卷第一百四十上

唐書一百九十上

文苑上

孔紹安

袁朗

賀德仁

庾抱

蔡允恭

鄭世翼

謝偃

崔信明

張蘊古

劉胤之

張昌齡

崔行功

孟利貞

董思恭

元思敬

徐齊聃

杜易簡

從祖弟審言

盧照隣

楊炯

王勃

兄勣勔

駱賓王

鄧玄挺

列傳卷第一百四十中

唐書一百九十中

文苑中

郭正一

元萬頃

范履冰苗神客周思茂附

胡楚賓

喬知之

弟侶備劉希夷

劉允濟

富嘉謨

吳少微谷倚附

員半千

丘悅

劉憲

父思立王適司馬鎰梁載言附

沈佺期

弟全交

陳子昂

閻丘均

宋之問

弟之悌之遜

閻朝隱

王無競

李適

尹元凱

賈曾

子至

許景先

賀知章

席豫

徐安貞

齊澣

王澣

李邕

孫逖

子宿絳成

宿子公器

列傳卷第一百四十下

唐書一百九十下

文苑下

李華

蕭穎士

李翰附

陸據

崔顥

王昌齡

孟浩然

元德秀

王維

李白

杜甫

吳通玄

兄通微

盧景亮

王仲舒

崔咸

唐次

子扶持弟欵欵子枝

劉蕡

李商隱

弟義叟

溫庭筠

薛逢

子廷珪

李拯

李巨川

司空圖

列傳卷第一百四十一

唐書一百九十一

方伎

崔善為

薛頤

甄權弟立言

宋俠

許胤宗

乙弗弘禮

袁天綱

孫思邈

明崇儼

張憬藏

李嗣貞

張文仲

尚獻甫裴知古附

孟詵

嚴善思

金梁鳳

張果

葉法善

僧玄奘

神秀六祖慧能弟子
普寂義福附

一行泓附

桑道茂

列傳卷第一百四十二

唐書一百九十二

隱逸

王績

田遊巖

史德義

王友貞

盧鴻一

王希夷

衛大經

李元愷

王守慎

徐仁紀

孫處玄

白履忠

王遠知

潘師正

劉道合

司馬承禎

吳筠

孔述睿
子敏行

陽城

崔覲

列傳卷第一百四十三

唐書一百九十三

烈女

李德武妻裴氏

楊慶妻王氏
獨祇師仁
乳母王氏附

楊三安妻李氏

魏衡妻王氏

樊會仁母敬氏

絳州孝女衛氏

濮州孝女賈氏

鄭義宗妻盧氏

劉寂妻夏侯氏

楚王靈龜妃上官氏

楊紹宗妻王氏

于敏直妻張氏

冀州女子王氏

樊彥琛妻魏氏

鄒保英妻奚氏

古玄應妻高氏附

宋庭瑜妻魏氏

崔繪妻盧氏

奉天縣實氏二女

盧甫妻李氏

王泛妻裴氏附

鄒待徵妻薄氏

李湍妻

董昌齡母楊氏

韋雍妻蘭陵縣君蕭氏

衡方厚妻武昌縣君程氏

女道士李玄真

孝女王和子

鄭神佐女附

列傳卷第一百四十四上

唐書一百九十四上

突厥上

列傳卷第一百四十四下

唐書一百九十四下

突厥下

列傳卷第一百四十五

唐書一百九十五

廻紇

列傳卷第一百四十六上

唐書一百九十六上

吐蕃上

列傳卷第一百四十六下

唐書一百九十六下

吐蕃下

列傳卷第一百四十七

唐書一百九十七

南蠻

西南蠻

林邑

婆利

盤盤

真臘

陀洹

訶陵

墮和羅

墮婆登

東謝蠻

西趙蠻

牂牁蠻

南平僚

東女國

南詔蠻

驃國

列傳卷第一百四十八

唐書一百九十八

西戎

泥婆羅

党項羗

高昌

吐谷渾

焉耆

龜茲

疎勒

于闐

天竺

罽賓

康國

波斯

拂菻

大食

列傳卷第一百四十九上

唐書一百九十九上

東夷

高麗

百濟

新羅

倭國

日本

列傳卷第一百四十九下

唐書一百九十九下

北狄

鐵勒

契丹

奚

室韋

靺鞨

渤海靺鞨

靺鞨

烏羅渾

列傳卷第一百五十上

唐書二百上

安祿山

子慶緒

高尚

孫孝哲

史思明

朝義

列傳卷第一百五十下

唐書二百下

朱泚

秦宗權

黃巢

唐書目錄終

唐書本紀卷第一

監修國史推誠守節保運功臣特進守司空兼門下侍郎同中書門下平章事上柱國譙國公食邑五千戶食實封四百戶臣劉昫等奉勅修

皇明奉勅提督南畿學政山西道監察御史餘姚聞人詮校刻

蘇州府儒學訓導門人嘉興沈桐同校

高祖

高祖神堯大聖光孝皇帝姓李氏諱淵其先隴西狄道人涼武昭王暕七代孫也暕生歆歆生重耳仕魏爲弘農太守重耳生熙熙爲金門鎮將領豪傑鎮武川因家焉儀鳳中追尊宣皇帝熙生天錫仕魏爲幢主大統中贈司空儀鳳中追尊光皇帝皇祖諱虎後衛左僕射封隴西郡公與周文帝及太保李弼大司馬獨孤信等以功叅佐命當時稱爲八柱國家仍賜姓大野氏周受禪追封唐國公謚曰襄至隋文帝作相還復本姓武德初追尊景皇帝廟號太祖陵曰永康皇考

諱昞周安州總管柱國大將軍襲唐國公諡曰仁武德初追尊元皇帝廟號世祖陵曰興寧高祖以周天和元年生於長安七歲襲唐國公及長個儻豁達任性真率寬仁容衆無貴賤咸得其歡心隋受禪補千牛備身文帝獨孤皇后即高祖從母也由是特見親愛累轉譙隴岐三州刺史有史世良者善相人謂高祖曰公骨法非常必爲人主願自愛勿忘鄙言高祖頗以自負大業初爲滎陽樓煩二郡太守徵爲殿內少監九年遷衛尉少卿遼東之役督運於懷遠鎮及楊玄感反詔高祖馳驛鎮弘化郡兼知關右諸軍事高祖歷試中外素樹恩德及是結納豪傑衆多款附時煬帝多所猜忌人懷疑懼會有詔徵高祖詣行在所遇疾未謁時甥王氏在後宮帝問曰汝舅何遲王氏以疾對帝曰可得死否高祖聞之益懼因縱酒沈湎納賄以混其迹焉十一年煬帝幸汾陽宮命高祖往山西河東黜陟討捕師次龍門賊帥毋端兒帥衆數千薄於城下高祖從十餘騎擊之所射七十發皆應弦而倒賊乃大潰十二年遷右驍衛將軍十三年爲太原留

守郡丞王威武牙郎將高君雅爲副將群賊蜂起江都阻絕太宗與晉陽令劉文靜首謀勸舉義兵俄而馬邑校尉劉武周據汾陽宮舉兵反太宗與王威高君雅將集兵討之高祖乃命太宗與劉文靜及門下客長孫順德劉弘基各募兵旬日間衆且一萬密遣使召世子建成及元吉于河東威君雅見兵大集恐高祖爲變相與疑懼請高祖祈雨於晉祠將爲不利晉陽鄉長劉世龍知之以告高祖高祖陰爲之備五月甲子高祖與威君雅視事太宗密嚴兵於外以備非常遣開陽府司馬劉政會告威等謀反即斬之以徇遂起義兵甲戌遣劉文靜使於突厥始畢可汗令率兵相應六月甲申命太宗將兵徇西河下之癸巳建大將軍府并置三軍分爲左右以世子建成爲隴西公左領大都督左統軍隸焉太宗爲燉煌公右領大都督右統軍隸焉裴寂爲大將軍府長史劉文靜爲司馬石艾縣長殷開山爲掾劉政會爲屬長孫順德劉弘基竇琮等分爲左右統軍開倉庫以賑窮乏遠近響應秋七月壬子高祖率兵西圖關中以元吉爲鎮北將軍

太原留守癸丑發自太原有兵三萬丙辰師次靈石縣營於賈胡堡
隋武牙郎將宋老生屯霍邑以拒義師會霖雨積旬餽運不給高祖
命旋師太宗切諫乃止有白衣老父詣軍門曰余爲霍山神使謁唐
皇帝曰八月雨止路出霍邑東南吾當濟師高祖曰此神不欺趙無
恤豈負我哉八月辛巳高祖引師趨霍邑斬宋老生平霍邑丙戌進
下臨汾郡及絳郡癸巳至龍門突厥始畢可汗遣康稍利率兵五百
人馬二千疋與劉文靜會于麾下隋驍衛大將軍屈突通鎮河東津
梁斷絕關中向義者頗以爲阻於東水濱居人競進舟楫不謀而至
前後數百人九月壬寅馮翊賊帥孫華土門賊帥白玄度各率其衆
送款并具舟楫以待義師高祖令華與統軍王長諧劉弘基引兵渡
河屈突通遣其武牙郎將桑顯和率衆數千夜襲長諧義師不利太
宗以遊騎數百掩其後顯和潰散義軍復振丙辰馮翊太守蕭造以
郡來降戊午高祖親率衆圍河東屈突通自守不出乃命攻城不利
而還文武將吏請高祖領太尉加置僚佐從之華陰令李孝常以永

豐倉來降庚申高祖率軍濟河舍于長春宮三秦士庶至者以千
數高祖禮之咸過所望人皆喜悅丙寅遣隴西公建成司馬劉文靜
屯兵永豐倉兼守潼關以備他盜太宗率劉弘基長孫順德等前後
數萬人自渭北徇三輔所至皆下高祖從弟父神通起兵鄠縣柴氏
婦舉丘於司竹至是並與太宗會鄠縣賊帥丘師利李仲文整屋賊
帥何潘仁等合衆數萬來降乙亥命太宗自渭汭屯兵阿城隴西公
建成自新豐趣霸上高祖率大軍自下邳西上經煬帝行宮園苑悉
罷之宮女放還親屬冬十月辛巳至長樂宮有衆二十萬京師留守
刑部尚書衛文昇右翊衛將軍陰世師京兆郡丞滑儀挾代王侑以
拒義師高祖遣使至城下諭以匡復之意再三皆不報諸將固請圍
城十一月丙辰攻拔京城衛文昇先已病死以陰世師滑儀等拒義
兵並斬之癸亥率百僚備法駕立代王侑爲天子遙尊煬帝爲太上
皇大赦改元爲義寧甲子隋帝詔加高祖假黃鉞使持節大都督內
外諸軍事大丞相進封唐王摠錄萬機以武德殿爲丞相府改教爲

今以隴西公建成爲唐國世子太宗爲京兆尹改封秦公姑臧公元
吉爲齊公十二月癸未丞相府置長史司錄已下官僚金城賊帥薛
舉寇扶風命太宗爲元帥擊之遣趙郡公孝恭招慰山南所至皆下
癸巳太宗大破薛舉之衆於扶風屈突通自潼關奔東都劉文靜等
追擒於閿鄉虜其衆數萬河池太守蕭瑀以郡降丙午遣雲陽令詹
俊武功縣正李仲哀徇巴蜀下之二年春正月戊辰世子建成爲撫
寧大將軍東討元帥太宗爲副總兵七萬徇地東都二月清河賊帥
竇建德僭稱長樂王吳興人沈法興據丹陽起兵三月丙辰右屯衛
將軍宇文文化及弑隋太上皇於江都宮立秦王浩爲帝自稱大丞相
徙封太宗爲趙國公戊辰隋帝進高祖相國揔百揆備九錫之禮唐
國置丞相以下立皇帝祖已下四廟於長安通義里第夏四月辛卯
停竹使符頒銀莢符於諸郡戊戌世子建成及太宗自東都班師五
月乙巳天子詔高祖冕十有二旒建天子旌旗出警入蹕王后王女
爵命之號一遵舊典戊午隋帝詔曰天禍隋國大行太上皇遇盜江

都酷甚望夷鸞深驪北闕予小子奄造不愆哀號永感心情靡潰仰
惟荼毒仇復靡申形影相弔罔知啓處相國唐王膺期命世扶危拯
溺自北徂南東征西怨致九合於諸侯決百勝於千里糾率夷夏大
庇毗黎保乂朕躬繫王是賴德侔造化功格蒼旻兆庶歸心曆數斯
在屈爲人臣載違天命在昔虞夏揖讓相推苟非重華誰堪今禹當
今九服崩離三靈改卜大運去矣請避賢路兆謀布德 顧已莫能
私僮命駕須歸藩國予本代王及予而代天之所廢豈其如是庶憑
稽古之聖以誅四凶幸值惟新之恩預充三恪雪冤恥於皇祖守裡
祀爲孝孫朝聞夕殞及泉無恨今遵故事遜于舊邸庶官群辟改事
唐朝宜依前典趨上尊號若釋重負感泰兼懷假手真人俾除醜逆
濟濟多士明知朕意仍勅有司凡有表奏皆不得以聞遣使持節兼
太保刑部尚書光祿大夫梁郡公蕭造兼太尉司農少卿裴之隱奉
皇帝璽綬于高祖高祖辭讓百寮上表勸進至于再三乃從之隋帝
遜于舊邸改大興殿爲太極殿甲子高祖即皇帝位於太極殿命刑

部尚書蕭造兼太尉告於南郊大赦天下改隋義寧二年爲唐武德元年官人百姓賜爵一級義師所行之處給復三年罷郡置州改太守爲刺史丁卯宴百官于太極殿賜帛有差東都留守官共立隋越王侗爲帝壬申命相國長史裴寂等脩律令六月甲戌太宗爲尚書令相國府長史裴寂爲尚書右僕射相國府司馬劉文靜爲納言隋民部尚書蕭瑀相國府司錄竇威並爲內史令廢隋大業律令頒新格己卯備法駕迎皇高祖宣簡公已下神主祔於太廟追謚妃竇氏爲太穆皇后陵曰壽安康辰立世子建成爲皇太子封太宗爲秦王齊國公元吉爲齊王封宗室蜀國公孝基爲永安王柱國公道玄爲淮陽王長平公叔良爲長平王鄭國公神通爲永康王安吉公神符爲襄邑王柱國德良爲長樂王上開府道素爲竟陵王上柱國博義爲隴西王奉慈爲渤海王諸州總管加號使持節癸未封隋帝爲酈國公薛舉寇涇州命秦王爲西討元帥征之改封永康王神通爲淮安王壬辰加秦王雍州牧餘官如故辛丑內史令竇威卒秋七月丙午刑

部尚書肅造爲太子太保追封皇子玄霸爲衛王西突厥遣使內附秦王與薛舉大戰於涇州我師敗績八月壬午薛舉死其子仁果復僭稱帝命秦王爲元帥以討之丁亥詔曰隋太常卿高頴上柱國賀若弼並抗節不阿矯枉無撓司隸大夫薛道衡刑部尚書宇文弼左翊衛將軍董純並懷忠抱義以陷極刑宜從褒飾以慰泉壤頴可贈上柱國鄴國公弼贈上柱國杞國公各令有司加謚道衡贈上開府臨河縣公弼贈上開府平昌縣公純贈柱國狄道縣公又詔曰隋右驍衛大將軍李金才左光祿大夫李敏並鼎族高門元功世胄橫受屠殺朝野稱冤然李氏將興天祚有應冥契深隱妄肆誅夷朕受命君臨志存刷蕩申冤旌善無忘寤寐金才可贈上柱國申國公敏可贈柱國觀國公又前代酷濫子孫被流者並放還鄉里涼州賊帥李軌以其地來降拜涼州總管封涼王九月乙巳親錄囚徒改銀菟符爲銅魚符辛未追謚隋太上皇爲煬帝宇文化及至魏州鴆殺秦王浩僭稱太子國號許冬十月壬申朔日有蝕之李密率衆來降封皇

從父弟襄武公琛爲襄武王黃臺公瑗爲廬江王癸巳詔行傳仁均所造戊寅曆十一月己酉以京師穀貴令四面入關者車馬牛驢各給課米充其自食秦王大破薛仁果於淺水原降之隴右平乙巳涼王李軌僭稱天子於涼州詔頒五十三條格以約法緩刑十二月壬申加秦王太尉陝東道大行臺丁丑封上柱國李孝常爲義安王庚子李密反於苑林行軍總管盛彥師追討斬之二年春正月乙卯初令文官遭父母喪者聽去職黃門侍郎陳叔達兼納言二月丙戌詔天下諸宗人無職任者不在徭役之限每州置宗師一人以相統攝丁酉竇建德攻宇文化及于聊城斬之傳首突厥閏月辛丑劉武周侵我并州己酉李密舊將徐世勣以黎陽之衆及河南十郡降授黎州總管封曹國公賜姓李氏庚戌上微行都邑以察毗俗即日還宮甲寅賊帥朱粲殺我使散騎常侍段確奔洛陽夏四月乙巳王世充篡越王侗位僭稱天子國號鄭辛亥李軌爲其僞尚書安興貴所執以降河右平突厥始畢可汗死五月己卯鄴國公薨追崇爲隋帝諡曰

恭六月戊寅令國子學立周公孔子廟四時致祭仍博求其後癸亥
尚書右僕射裴寂爲晉州道行軍總管以討劉武周秋七月壬申置
十二軍以關內諸府分隸焉王世充遣其將羅士信侵我穀州士信
率其衆來降西突厥葉護可汗及高昌並遣使朝貢九月辛未賊帥
李子通據江都僭稱天子國號吳沈法興據毗陵僭稱梁王丁丑和
州賊帥杜伏威遣使來降授和州總管東南道行臺尚書令封楚王
裴寂與劉武周將宋金剛戰於介州我師敗績右武衛大將軍姜寶
誼死之并州總管齊王元吉懼武周所逼奔於京師并州陷乙未京
師地震冬十月己亥封幽州總管羅藝爲燕郡王賜姓李氏黃門侍
郎楊恭仁爲納言殺民部尚書魯國公劉文靜乙卯討劉武周軍于
蒲州爲諸軍聲援壬子劉武周進圍晉州甲子上親祠華岳十一月
丙子竇建德陷黎陽盡有山東之地淮安王神通左武侯大將軍李
世勣皆沒於賊十二月丙申永安王孝基工部尚書獨孤懷恩總管
于筠爲劉武周將宋金剛掩襲並沒焉甲辰狩于華山壬子大風拔

木三年春正月辛巳幸蒲州命祀舜廟癸巳至自蒲州甲午李世勣
於竇建德所自援歸國建德僭稱夏王二月丁酉京師西南地有聲
如山崩庚子幸華陰工部尚書獨孤懷恩謀反伏誅三月癸酉突
厥葉護可汗高昌王麴伯雅遣使朝貢突厥貢條支巨鳥巳卯改納
言爲侍中內史令爲中書令給事郎爲給事中甲戌內史侍郎封德
彝兼中書令封賊帥劉孝真爲彭城王賜姓李氏夏四月壬寅至自
華陰於益州置行臺尚書省甲寅加秦王益州道行臺尚書令秦王
大破宋金剛於介州金剛與劉武周俱奔突厥遂平并州僞揔管尉
遲敬德尋相以介州降六月壬辰徙封楚王杜伏威爲吳王賜姓李
氏加授東南道行臺尚書令丙午親錄囚徒封皇子元景爲趙王元
昌爲魯王元亨爲酆王皇孫承宗爲太原王承道爲安陸王承乾爲
恒山王恪爲長沙王泰爲宜都王秋七月壬戌命秦王率諸軍討王
世充遣皇太子鎮蒲州以備突厥丙申突厥殺劉武周於白道冬十
月庚子懷戌賊帥高開道遣使降授蔚州揔管封北平郡王賜姓李

氏

四年春正月丁卯竇建德行臺尚書令胡大恩以大安鎮來降封定襄郡王賜姓李氏辛巳命皇太子摠統諸軍討稽胡三月徙封宜都王泰爲衛王竇建德來援王世充攻陷我管州夏四月甲寅封皇子元方爲周王元禮爲鄭王元嘉爲宋王元則爲荆王元茂爲越王初置都護府官員五月己未秦王大破竇建德之衆於武牢擒建德河北悉平丙寅王世充舉東都降河南平秋七月甲子秦王凱旋獻俘於太廟丁卯大赦天下廢五銖錢行開元通寶錢斬竇建德於市流王世充於蜀未發爲讎人所害甲戌建德餘黨劉黑闥據漳反置山東道行臺尚書省於洛州八月充州摠管徐圓朗舉兵反以應劉黑闥僭稱魯王冬十月乙丑加秦王天策上將位在王公上領司徒陝東道大行臺尚書令齊王元吉爲司空乙巳趙郡王孝恭平荊州獲蕭銑十一月甲申於洛州置大行臺廢洛州都督府庚寅焚都督紫微宮乾陽殿會稽賊帥李子通以其地來降十二月丁卯命秦王及齊

王元吉計劉黑闥壬申徙封宋王元嘉爲徐王五年春正月丙申劉黑闥據洛州僭稱漢東王三月丁未秦王破劉黑闥于洛水上盡復所陷州縣黑闥亡奔突厥蔚州摠管北平王高開道叛寇易州夏四月庚戌秦王還京師高祖迎勞於長樂宮壬申代州摠管定襄郡王大恩爲虜所敗戰死六月劉黑闥引突厥寇山東置諫議大夫官貞秋七月丁亥吳王伏威來朝隋漢陽太守馮盎以南越之地來降嶺表悉定八月辛亥以洛荆并幽交五州爲大摠管府改封恒山王承乾爲中山王葬隋煬帝於揚州丙辰突厥頡利寇鴈門己未進寇朔州遣皇太子及秦王討擊大敗之冬十月癸酉遣齊王元吉擊劉黑闥於洛州時山東州縣多爲黑闥所守所在殺長吏以應之行軍摠管淮陽王道玄與黑闥戰于下博道玄敗沒十一月甲申命皇太子率兵討劉黑闥丙申幸宜州簡閱將士十二月丙辰校獵於華池庚申至自宜州皇太子破劉黑闥於魏州斬之山東平六年春正月吳王杜伏威爲太子太保二月辛亥校獵於驪山三月乙未幸昆明池宴

百官夏四月己未舊宅改爲通義宮曲赦京城繫囚於是置酒高會
賜從官帛各有差癸酉以尚書右僕射魏國公裴寂爲左僕射中書
令宋國公蕭瑀爲右僕射侍中觀國公楊恭仁爲吏部尚書秋七月
突厥頡利寇朔州遣皇太子及秦王屯并州以備之八月壬子東南
道行臺僕射輔公祏據丹陽反僭稱宋王遣趙郡王孝恭及嶺南道
大使永康縣公李靖討之丙寅吐谷渾內附九月丙子突厥退皇太
子班師改東都爲洛州高開道引突厥寇幽州冬十月辛華陰十一
月校獵於沙苑十二月乙巳以奉義監爲龍躍宮武功宅爲慶善宮
甲寅至自華陰

七年春正月己酉封高麗王高武爲遼東郡王百濟王扶餘璋爲帶
方郡王新羅王金真平爲樂浪郡王二月高開道爲部將張金樹所
殺以其地降丁巳幸國子學親臨釋奠改大摠管府爲大都督府吳
王伏威薨三月戊寅廢尚書省六司侍郎增吏部郎中秩正四品掌
選事戊戌趙郡王孝恭大破輔公祏擒之丹陽平夏四月庚子大赦

天下頒行新律令以天下大定詔遭父母喪者聽終制五月造仁智宮於宜州之宜君縣李世勣討徐圓朗平之六月辛丑幸仁智宮秋七月甲午至自仁智宮雋州地震山崩江水咽流八月戊辰突厥寇并州京師戒嚴壬午突厥退乙未京師解嚴冬十月丁卯幸慶善宮癸酉幸終南山謁老子廟十一月戊辰校獵于高陵庚午至自慶善宮八年春二月己巳親錄囚徒多所原宥夏四月造太和宮於終南山六月甲子幸太和宮突厥寇定州命皇太子徃幽州秦王徃并州以備突厥八月并州道愬管張公謹與突厥戰於太皇師敗績中書令溫彥博沒於賊九月突厥退冬十月辛巳幸周氏陂校獵因幸龍躍宮十一月辛卯幸宜州庾子講武於同官縣改封蜀王元軌爲吳王漢王元慶爲陳王加授秦王中書令齊王元吉侍中天策上將府司馬宇文士及權檢校侍中十二月辛酉至自宜州

九年春正月丙寅命州縣修城隍備突厥尚書左僕射魏國公裴寂爲司空二月庚申加齊王元吉爲司徒戊寅親祠社稷三月辛卯幸

昆明池夏五月辛巳以京師寺觀不甚清淨詔曰釋迦闡教清淨爲先遠離塵垢斷除貪慾所以弘宣勝業修植善根開導愚迷津梁品庶是以敷演經教檢約學徒調懺身心捨諸染著衣服飲食咸資四輩自覺王遷謝像法流行末代陵遲漸以虧濫乃有猥賤之侶規自尊高浮惰之人苟避徭役妄爲剃度託號出家嗜慾無厭營求不息出入閭里周旋闐闐驅策田產聚積貨物耕織爲生估販成業事同編戶迹等齊人進違戒律之文退無禮典之訓至乃親行劫掠躬自穿窬造作妖訛交通豪猾每罹憲網自陷重刑黷亂真如傾毀妙法譬茲稂莠有穢嘉苗類彼淤泥混夫清水又伽藍之地本曰淨居栖心之所理尚幽寂近代以來多立寺舍不求閑曠之境唯趨喧雜之方繕采崎嶇棟宇殊拓錯舛隱匿誘納姦邪或有接延鄺邸隣近屠酤埃塵滿室羶腥盈道徒長輕慢之心有虧崇敬之義且老氏垂化本實冲虛養志無爲遺情物外全真守一是謂玄門驅馳世務尤乖宗旨朕膺期馭宇興隆教法志思利益情在護持欲使玉石區分薰

猶有辨長存妙道永固福田正本澄源宜從沙汰諸僧尼道士女冠等有精勤練行守戒律者並令大寺觀居住給衣食勿令乏短其不能精進戒行者有闕不堪供養者並令罷遣各還桑梓所司明爲條式務依法教違制之事悉宜停斷京城留寺三所觀二所其餘天下諸州各留一所餘悉罷之事竟不行六月庚申秦王以皇太子建成與齊王元吉同謀害已率兵誅之詔立秦王爲皇太子摠統萬機大赦天下八月癸亥詔傳位于皇太子尊帝爲太上皇徙居弘義宮改名太安宮貞觀八年三月甲戌高祖讌西突厥使者於兩儀殿顧謂長孫無忌曰當今蠻夷率服古未嘗有無忌上千萬歲壽高祖大悅以酒賜太宗太宗又奉觴上壽流涕而言曰百姓獲安四夷咸附皆奉遵聖旨豈臣之力於是太宗與文德皇后互進御膳并上服御衣物一同家人常禮是歲閱武於城西高祖親自臨視勞將士而還置酒於未央宮三品已上咸侍高祖命突厥頡利可汗起舞又遣南越酋長馮智戴詠詩既而笑曰胡越一家自古未之有也太宗奉觴上

壽曰臣早蒙慈訓教以文道爰從義旗平定京邑重以薛舉武周世
充建德皆上稟睿筭幸而尅定三數年間混一區宇天慈崇寵遂蒙
重任今上天垂祐時和歲阜被髮左衽並爲臣妾此豈臣智力皆由
上稟聖筭高祖大悅群臣皆呼萬歲極夜方罷九年五月庚子高祖
大漸下詔旣殯之後皇帝宜於別所視軍國大事其服輕重悉從漢
制以日易月園陵制度務從儉約是日崩於太安宮之垂拱前殿年
七十群臣上謚曰大武皇帝廟號高祖十月庚寅葬於獻陵高宗上
元元年八月改上尊號曰神堯皇帝天寶十三年二月上尊號神堯
大聖大光孝皇帝

史臣曰有隋季年皇圖板蕩荒主燁燎原之焰羣盜發逐鹿之機殄
暴無厭橫流靡救高祖審獨夫之運去知新主之勃興密運雄圖未
伸龍躍而屈已求可汗之援卑辭荅李密之書決神機而速若疾雷
驅豪傑而從如偃草洎謳謠允屬揖讓受終刑名大剗于煩苛爵位
不踰於適軸繇是攫金有恥伏莽知非人懷漢道之寬平不責高皇

之慢罵然而優柔失斷浸潤得行誅文靜則議法不從酬裴寂則曲
恩太過姦佞由之貝錦嬖幸得以掇蜂獻公遂間於申生小白寧懷
於召忽一旦兵交愛子矢集申孫匈奴尋犯於便橋京邑咸憂於左
袵不有聖子王業殆哉
贊曰高皇創圖勢若摧枯國運神武家難聖謨言生牀第禍切肌膚
鴟鴞之詠無損於吾

唐書本紀卷第一

唐書本紀卷第二

劉 昫

等修

聞人詮校刻施綱同校

太宗上

太宗文武大聖大廣孝皇帝諱世民高祖第二子也母曰太穆順聖皇后竇氏隋開皇十八年十二月戊午生於武功之別館時有龍戲於館門之外三日而去高祖之臨岐州太宗時年四歲有書生自言善相謁高祖曰公貴人也且有貴子見太宗曰龍鳳之姿天日之表年將二十必能濟世安民矣高祖懼其言泄將殺之忽失所在因採濟世安民之義以爲名焉太宗幼聰睿玄鑒深遠臨機果斷不拘小節時人莫能測也大業末煬帝於鴈門爲突厥所圍太宗應募救援隸屯衛將軍雲定興營將行謂定興曰必賁旗鼓以設疑兵且始畢可汗舉國之師敢圍天子必以國家倉卒無援我張軍容令數十里幡旗相續夜則鉦鼓相應虜必謂救兵雲集望塵而遁矣不然彼

衆我寡悉軍來戰必不能支矣定興從焉師次崞縣突厥候騎馳告
始畢曰王師大至由是解圍而遁及高祖之守太原太宗時年十八
有高陽賊帥魏刀兒自號歷山飛來攻太原高祖擊之深入賊陣太
宗以輕騎突圍而進射之所向皆披靡拔高祖於萬衆之中適會步
兵至高祖與太宗又奮擊大破之時隋祚已終太宗潛圖義舉每折
節下士推財養客群盜大俠莫不願効死力及義兵起乃率兵略徇
西河剋之拜右領大都督右三軍皆隸焉封燉煌郡公大軍西上賈
胡堡隋將宋老生率精兵二萬屯霍邑以拒義師會久雨糧盡高祖
與裴寂議且還太原以圖後舉太宗曰本興大義以救蒼生當須先
入咸陽號令天下遇小敵即班師將恐從義之徒一朝解體還守太
原一城之地此爲賊耳何以自全高祖不納促令引發太宗遂號泣
於外聲聞帳中高祖召問其故對曰今兵以義動進戰則必剋退還
則必散衆散於前敵乘於後死亡須臾而至是以悲耳高祖乃悟而
止八月己卯雨霽高祖引師趣霍邑太宗恐老生不出戰乃將數騎

先詣其城下舉鞭指麾若將圍城者以激怒之老生果怒開門出兵背城而陣高祖與建成合陣於城東太宗及柴紹陣於城南老生麾兵疾進先薄高祖而建成墜馬老生乘之高祖與建成軍咸却太宗自南原率二騎馳下峻坂衝斷其軍引兵奮擊賊衆大敗各捨仗而走懸門發老生引繩欲上遂斬之平霍邑至河東關中豪傑爭走赴義太宗請進師入關取永豐倉以賑窮乏收群盜以圖京師高祖稱善太宗以前軍濟河先定渭北三輔吏民及諸豪猾詣軍門請自効者日以千計扶老携幼滿於麾下收納英俊以備僚列遠近聞者咸自託焉師次于涇陽勝兵九萬破胡賊劉鷄子并其衆留殷開山劉弘基屯長安故城太宗自趣司竹賊帥李仲文何潘仁向善志等皆來會頓于阿城獲兵十三萬長安父老賁牛酒詣旌門者不可勝紀勞而遣之一無所受軍令嚴肅秋毫無所犯尋與大軍平京城高祖輔政受唐國內史改封秦國公會薛舉以勁卒十萬來逼渭濱太宗親擊之大破其衆追斬萬餘級略地至于隴坻義寧元年十二月復

爲右元帥揔兵十萬徇東都及將旋謂左右曰賊見吾還必相追躡設三伏以待之俄而隋將段達率萬餘人自後而至度三王陵發伏擊之段達大敗追奔至于城下因於宜陽新安置熊羆二州戍之而還徙封趙國公高祖受禪拜尚書令右武侯大將軍進封秦王加授雍州牧武德元年七月薛舉寇涇州太宗率衆討之不利而旋九月薛舉死其子仁杲嗣立太宗又爲元帥以擊仁杲相持於折塢城深溝高壘者六十餘日賊衆十餘萬兵鋒甚銳數來挑戰太宗按甲以挫之賊糧盡其將牟君才梁胡郎來降太宗謂諸將軍曰彼氣衰矣吾當取之遣將軍龐玉先陣於淺水原南以誘之賊將宗羅候併軍來拒玉軍幾敗旣而太宗親御大軍奄自原北出其不意羅候望見復迴師相拒太宗將驍騎數十入賊陣於是王師表裏齊奮羅候大潰斬首數千級投澗谷而死者不可勝計太宗率左右二十餘騎追奔直趣折塢以乘之仁杲大懼嬰城自守將夕大軍繼至四面合圍詰朝仁杲請降俘其精兵萬餘人男女五萬口旣而諸將奉賀因問

曰始大王野戰破賊其主尚保堅城王無攻具輕騎騰逐不待步兵徑薄城下咸疑不剋而竟下之何也太宗曰此以權道迫之使其計不暇發以故剋也羅睺恃往年之勝兼復養銳日久見吾不出意在相輕今喜吾出悉兵來戰雖擊破之擒殺蓋少若不急躡還走投城仁杲收而撫之則便未可得矣且其兵衆皆隴西人一敗披退不及迴顧散歸隴外則折塢自虛我軍隨而迫之所以懼而降也此可謂成筭諸君盡不見耶諸將曰此非凡人所能及也獲賊兵精騎甚衆還令仁杲兄弟及賊帥宗羅睺翟長孫等領之太宗與之遊獵馳射無所間然賊徒荷恩懾氣咸願効死時李密初附高祖令密馳傳迎太宗於幽州密見太王安神武軍威嚴肅驚悚歎服私謂殷開山曰真英主也不如此何以定禍亂乎凱旋獻捷於太廟拜太尉陝東道行臺尚書令鎮長春宮關東兵馬並受節度尋加左武侯大將軍涼州摠管宋金剛之陷滄州也兵鋒甚銳高祖以王行本尚據蒲州呂崇茂反於夏縣晉滄二州相繼陷沒關中震駭乃手勅曰賊勢如

此難與爭鋒宜棄河東之地謹守關西而已太宗上表曰太原王業所基國之根本河東殷實京邑所資若舉而棄之臣竊憤恨願假精兵三萬必能平殄武周克復汾晉高祖於是悉發關中兵以益之又幸長春宮親送太宗

二年十一月太宗率衆趣龍門關履冰而渡之進屯栢壁與賊將宋金剛相持尋而永安王孝基敗於夏縣于筠獨孤懷恩唐儉並爲賊將尋相尉遲敬德所執將還滄州太宗遣殷開山秦叔寶邀之於美良川大破之相等僅以身免悉虜其衆復歸栢壁於是將咸請戰太宗曰金剛懸軍千里深入吾地精兵驍將皆在於此武周據太原專倚金剛以爲捍士卒雖衆內實空虚意在速戰我堅營蓄銳以挫其鋒糧盡計窮自當遁走

三年二月金剛竟以衆餒而遁太宗追之至介州金剛列陣南北七里以拒官軍太宗遣摠管李世勣程巖金秦叔寶當其北程長孫秦武通當其南諸軍戰小却爲賊所乘太宗率精騎擊之衝其陣後賊

衆大敗追奔數十里敬德相率衆八千來降還令敬德督之與軍營相叅屈突通懼其爲變驟以爲請太宗曰昔蕭王推赤心置人腹中並能畢命今委任敬德又何疑也於是劉武周奔於突厥并汾悉復舊地詔就軍加拜益州道行臺尚書令七月揔率諸軍攻王世充於洛邑師次穀州世充率精兵三萬陣於慈澗太宗以輕騎挑之時衆寡不敵陷於重圍左右咸懼太宗命左右先歸獨留後殿世充驍將單雄信數百騎夾道來逼交搶競進太宗幾爲所敗太宗左右射之無不應弦而倒獲其大將燕頤世充乃拔慈澗之鎮歸於東都太宗遣行軍揔管史萬寶自宜陽南據龍門劉德威自太行東圍河內王君廓自洛口斷賊糧道又遣黃君漢夜從孝水河中下舟師襲廻洛城剋之黃河已南莫不響應城堡相次來降大軍進屯邙山九月太宗以五百騎先觀戰地卒與世充萬餘人相遇會戰復破之斬首三千餘級獲大將陳智略世充僅以身免其所署筠州揔管楊慶遣使請降遣李世勣率師出轅轅道安撫其衆策汴有豫九州相繼來降

世充遂求救於竇建德四年二月又進屯青城宮營壘未立世充衆二萬自方諸門臨穀水而陣太宗以精騎陣於北邨山令屈突通率步卒五千渡水以擊之因誡通曰待兵交即放煙吾當率騎軍南下兵纔接太宗以騎衝之挺身先進與通表裏相應賊衆殊死戰散而復合者數焉自辰及午賊衆始退縱兵乘之俘斬八千人於是進營城下世充不敢復出但嬰城自守以待建德之援太宗遣諸軍掘塹匝布長圍以守之吳王杜伏威遣其將陳正通徐召宗率精兵二千來會於軍所僞鄭州司馬沈悅以武牢降將軍王君廓應之擒其僞荆王王行本會竇建德以兵十餘萬來援世充至于酸棗蕭瑀屈突通封德彝皆以腹背受敵恐非萬全請退師穀州以觀之太宗曰世充糧盡內外離心我當不勞攻擊坐收其敝建德新破孟海公將驕卒惰吾當進據武牢扼其襟要賊若冒險與我爭鋒破之必矣如其不戰旬日間世充當自潰若不速進賊入武牢諸城新附必不能守二賊併力將若之何通又請解圍就險以候其變太宗不許於是留通

輔齊王元吉以圍世充親率步騎三千五百人趣武牢建德自滎陽西上築壘於板渚太宗屯武牢相持二十餘日諜者曰建德伺官軍芻盡候牧馬於河北因將襲武牢太宗知其謀遂牧馬河北以誘之詰朝建德果悉衆而至陳兵汜水世充將郭士衡陣於其南綿亘數里鼓譟諸將大懼太宗將數騎昇高丘以望之謂諸將曰賊起山東未見大敵今度險而戰是無政令逼城而陣有輕我心我按兵不出彼迺氣衰陣久卒饑必將自退追而擊之無往不剋吾與公等約必以午時後破之建德列陣自辰至午兵士饑倦皆坐列又爭飲水逡巡歛退太宗曰可擊矣親率輕騎追而誘之衆繼至建德迴師而陣未及整列太宗先登擊之所向皆靡俄而衆軍合戰罨塵四起太宗率史大奈程璆金秦叔寶宇文歆等揮幟而入直突出其陣後張我旗幟賊顧見之大潰追奔三十里斬首三千餘級虜其衆五萬生擒建德於陣太宗數之曰我以干戈問罪本在王世充得失存亡不預汝事何故越境犯我兵鋒建德股慄而言曰今若不來恐勞遠取

高祖聞而大悅手詔曰隋氏分崩嶠幽隔絕兩雄合勢一朝清蕩兵
既剋捷更無死傷無愧爲臣不憂其父並汝功也乃將建德至東都
城下世充懼率其官屬二千餘人詣軍門請降山東悉平太宗入據
宮城令蕭瑀竇軌等封守府庫一無所取令記室房玄齡收隋圖籍
於是誅其同惡段達等五十餘人枉被囚禁者悉釋之非罪誅戮者
祭而誅之大饗將士班賜有差高祖令尚書左僕射裴寂勞於軍中
六月凱旋太宗親披黃金甲陳鐵馬一萬騎甲士三萬人前後部鼓
吹俘二僞主及隋氏器物輦輅獻于太廟高祖大悅行飲至禮以享
焉高祖以自古舊官不稱殊功乃別表徽號用旌勲德十月加號天
策上將陝東道大行臺位在王公上增邑二萬戶通前二萬戶賜金
輅一乘袞冕之服玉璧一雙黃金六千斤前後部鼓吹及九部之樂
班劍四十人于時海內漸平太宗乃銳意經籍開文學館以待四方
之士行臺司勳郎中杜如晦等十有八人爲孝士每更置閣下降以
溫顏與之討論經義或夜分而罷未幾竇建德舊將劉黑闥舉兵反

據洺州十二月太宗揔戎東計

五年正月進軍肥鄉分兵絕其糧道相持兩月黑闥窘急求戰率步騎二萬南渡洺水晨壓官軍太宗親率精騎擊其馬軍破之乘勝蹂其步卒賊大潰斬首萬餘級先是太宗遣堰洺水上流使淺令黑闥得渡及戰乃令決堰水大至深丈餘賊徒旣敗赴水者皆溺死焉黑闥與二百餘騎北走突厥悉虜其衆河北平時徐圖阻兵徐充太宗廻師討平之於是河濟江淮諸郡邑皆平十月加左右十二衛大將軍七年秋突厥頡利二可汗自原州入寇侵擾關中有說高祖云祇爲府藏子女在京師故突厥來若燒却長安而不都則胡寇自止高祖乃遣中書侍郎宇文士及行山南可居之地即欲移都蕭瑀等皆以爲非然終不敢犯顏正諫太宗獨曰霍去病漢廷之將帥耳猶且志滅匈奴臣忝備藩維尚使胡塵不息遂令陛下議欲遷都此臣之責也幸乞聽臣一申微効取彼頡利若一兩年間不係其頸徐建移都之策臣當不敢復言高祖怒仍遣太宗將三十餘騎行剗還日

固奏必不可移都高祖遂止八年加中書令九年皇太子建成齊王
元吉謀害太宗六月四日太宗率長孫無忌尉遲敬德房玄齡杜如
晦宇文士及高士廉侯君集程知節秦叔寶段志玄屈突通張士貴
等於玄武門誅之甲子立爲皇太子庶政皆斷決太宗乃縱禁苑所
養鷹犬并停諸方所進珍異政尚簡肅天下大悅又令百官各上封
事備陳安人理國之要已巳令曰依禮二名不偏諱近代已來兩字
兼避廢闕已多率意而行有違經典其官號人名公私文籍有世民
兩字不連續者並不須諱罷幽州大都督府辛未廢陝東道大行臺
置洛州都督府廢益州道行臺置益州大都督府壬午幽州大都督
廬江王瑗謀逆廢爲庶人乙酉罷天策府七月壬辰太子左庶子高
士廉爲侍中右庶子房玄齡爲中書令尚書右僕射蕭瑀爲尚書左
僕射吏部尚書楊恭仁爲雍州牧太子左庶子長孫無忌爲吏部尚
書右庶子杜如晦爲兵部尚書太子詹事宇文士及爲中書令封德
彞爲尚書右僕射八月癸亥高祖傳位於皇太子太宗即位於東宮

顯德殿遣司空魏國公裴寂柴告于南郊大赦天下武德元年以來
責情流配者並放還文武官五品已上先無爵者賜爵一級六品已
下加勲一轉天下給復一年癸酉放掖庭宮女三千餘人甲戌突厥
頡利突利寇涇州乙亥突厥進寇武功京師戒嚴丙子立妃長孫氏
爲皇后己卯突厥寇高陵辛巳行軍總管尉遲敬德與突厥戰於涇
陽大破之斬首千餘級癸未突厥頡利至于渭水便橋之北遣其酋
帥執失思力入朝爲覲自張形勢太宗命囚之親出玄武門馳六騎
幸渭水上與頡利隔津而語責以負約俄而衆軍繼至頡利見軍容
旣盛又知思力就拘由是大懼遂請和詔許焉即日還宮乙酉又幸
便橋與頡利刑白馬設盟突厥引退九月丙戌頡利獻馬三千疋羊
萬口帝不受令頡利歸所掠中國戶口丁未引諸衛騎兵統將等習
射于顯德殿庭謂將軍已下曰自古突厥與中國更有盛衰若軒轅
善用五兵即能北逐獯鬻周宣驅馳方召亦能制勝太原至漢晉之
君逮於隋代不使兵士素習干戈突厥來侵莫能抗禦致遣中國生

民塗炭於寇手我今不使汝等穿池築苑造諸淫費農民恣令逸樂
兵士唯習弓馬庶使汝鬪戰亦望汝前無橫敵於是每日引數百人
於殿前教射帝親自臨試射中者隨賞弓刀布帛朝臣多有諫者曰
先王制法有以兵刃至御所者刑之所以防萌杜漸備不虞也今引
裨卒之人彎弧縱矢於軒陛之側陛下親在其間正恐禍出非意非
所以爲社稷計也上不納自是後士卒皆爲精銳壬子詔私家不得
輒立妖神妄設淫祀非禮祠禱一皆禁絕其龜易五兆之外諸雜占
卜亦皆停斷長孫無忌封齊國公房玄齡邢國公尉遲敬德吳國公
杜如晦蔡國公侯君集潞國公冬十月丙辰朔日有蝕之癸亥立中
山王承乾爲皇太子癸酉裴寂食實封一千五百戶長孫無忌王君
廓尉遲敬德房玄齡杜如晦一千三百戶長孫順德柴紹羅藝趙郡
王孝恭一千二百戶侯君集張公謹劉師立一千戶李世勣劉弘基
九百戶高士廉宇文士及秦叔寶程知節七百人安興貴安修仁唐
儉寶軌屈突通蕭瑀封德彝劉義節六百戶錢九隴樊世興公孫武

達李孟常段志玄龐卿惲張亮李藥師杜淹元仲文四百戶張長遜
張平高李安遠李子和秦行師馬三寶三百戶十一月庚寅降宗室
封郡王者並爲縣公十二月癸酉親錄囚徒是歲新羅龜茲突厥高
麗百濟党項並遣使朝貢

貞觀元年春正月乙酉改元辛丑燕邵王李藝據涇州反尋爲左右
所斬傳首京師庚午以僕射竇軌爲益州大都督三月癸巳皇后親
蠶尚書左僕射宋國公蕭瑀爲太子少師丙午詔齊故尚書僕射崔
季舒給事黃門侍郎郭遵尚書右丞封孝琰等昔仕鄴中名位通顯
志存忠讜抗表極言無救社稷之亡遂見龍逢之酷其季舒子剛遵
子雲孝琰子君遵並以門遭時譴淫刑濫及宜從褒獎特異常倫可
免內侍量才別叙夏四月癸巳涼州都督長樂王幼良有罪伏誅六
月辛巳尚書右僕射密國公封德彝薨壬辰太子少保宋國公蕭瑀
爲尚書左僕射是夏山東諸州大旱令所在賑恤無出今年租賦秋
七月壬子吏部尚書齊國公長孫無忌爲尚書右僕射八月戊戌貶

侍中義興郡公高士廉爲安州大都督戶部尚書裴矩卒是月關東及河南隴右公邊諸州霜害秋稼九月辛酉命中書侍郎溫彥博尚書右丞魏徵等分往諸州賑恤中書令鄧國公宇文士及爲殿中監御史大夫檢校吏部尚書參預朝政安吉郡公杜淹署位十二月壬午上謂侍臣曰神仙事本虛妄空有其名秦始皇非分愛好遂爲方士所詐乃遣童男女數千人隨徐福入海求仙藥方士避秦苛虐因留不歸始皇猶海側踟躕以待之還至沙丘而死漢武帝爲求仙乃將女嫁道術人事旣無驗便行誅戮據此二事神仙不煩妄求也尚書左僕射宋國公蕭瑀坐事免戊申利州都督義安王孝常右武衛將軍劉德裕等謀反伏誅是歲關中饑至有鬻男女者

二年春正月辛丑尚書右僕射齊國公長孫無忌爲開府儀同三司徙封漢王恪爲蜀王衛王泰爲越王楚王祐爲燕王復置六侍郎副六尚書事并置左右司郎中各一人前安州大都督趙王元景爲雍州牧蜀王恪爲益州大都督越王泰爲揚州大都督二月丙戌靺鞨

內屬十二月戊申朔日有蝕之丁卯遣御史大夫杜淹巡關內諸州
出御府金寶贖男女自賣者還其父母庚午大赦天下夏四月己卯
詔骸骨暴露者令所在埋瘞丙申契丹內屬初詔天下州縣並置義
倉夏州賊帥梁師都爲其從父弟洛仁所殺以城降五月大雨雹六
月庚寅皇子治生宴五品以上賜帛有差仍賜天下是日生者粟辛
卯上謂侍臣曰君雖不君臣不可以不臣裴虔通煬帝舊左右也而
親爲亂首朕方崇獎敬義豈可猶使宰民訓俗詔曰天地定位君臣
之義以彰卑高旣陳人倫之道斯著是用篤厚風俗化成天下雖復
時經治亂主或昏明疾風勁草芬芬無絕剖心焚體赴蹈如歸夫豈
不愛七尺之軀重百年之命諒由君臣義重名教所先故能明大節
於當時立清風於身後至如趙高之殞二世董卓之鳩弘農人神所
疾異代同憤況凡庸小豎有懷凶悖遐觀典策莫不誅夷辰州刺史
長蛇縣男裴虔通昔在隋代委質晉藩煬帝以舊邸之情特相愛幸
遂乃志蔑君親潛圖弑逆密伺間隙招結羣醜長戟流矢一朝竊發

天下之惡孰云可忍宜其夷宗焚首以彰大戮但年代異時累逢赦令可特免極刑除名削爵遷配驪州秋七月戊申詔萊州刺史牛方裕絳州刺史薛世良廣州都督府長史唐奉義隋武牙郎將高元禮並於隋代俱蒙任用乃協契宇文化及構成弒逆宜依裴虔通除名配流嶺表太宗謂侍臣曰天下愚人好犯憲章凡赦宥之恩唯及不軌之輩古語曰小人之幸君子之不幸一歲再赦好人喑啞凡養稂莠者傷禾稼惠姦宄者賊良人昔文王作罰刑茲無赦又蜀先主嘗謂諸葛亮曰吾周旋陳元方鄭康成間每見啓告理亂之道備矣曾不語赦也夫小人者大人之賊故朕有天下已來不甚放赦今四海安靜禮義興行非常之恩施不可數將恐愚人常冀僥倖唯欲犯法不能改過八月甲戌朔幸朝堂親覽冤屈自是上以軍國無事每日視膳於西宮癸巳公卿奏曰依禮季夏之月可以居臺榭今隆暑未退秋霖方始宮中卑濕請營一閣以居之帝曰朕有氣病豈宜下濕若遂來請糜費良多昔漢文帝將起露臺而惜十家之產朕德不逮

于漢帝而所費過之豈謂爲民父母之道也竟不許是月河南河北
大霜人饑九月丙午詔曰尚齒重舊先王以之垂範還章解組朝臣
於是克終釋菜合樂之儀東膠西序之制養老之義遺文可觀朕恭
膺大寶憲章故實乙言尊事彌切深衷然情存今古世踵澆季而策
名就列或乖大體至若筋力將盡桑榆且迫徒竭夙興之勤未悟夜
行之罪其有心驚止足行堪激勵謝事公門收骸閭里能以禮讓固
可嘉焉内外文武羣官年高致仕抗表去職者叅朝之日宜在本品
見任之上丁未謂侍臣曰婦人幽閉深宮情實可愍隋氏末年求採
無已至于離宮別館非幸御之所多聚宮人皆竭人財力朕所不取
且灑掃之餘更何所用今將出之任求伉儷非獨以惜費亦人得各
遂其性於是遣尚書左丞戴胄給事中杜正倫等於掖庭宮西門簡
出之冬十月庚辰御史大夫安吉郡公杜淹卒戊子殺瀛州刺史盧
祖尚十一月辛酉有事於圓丘十二月壬午黃門侍郎王珪爲侍中
三年春正月辛亥契丹渠帥來朝戊午謁太廟癸亥親耕籍田辛未

司空魏國公裴寂坐事免二月戊寅中書令邢國公房玄齡爲尚書左僕射兵部尚書檢校侍中蔡國公杜如晦爲尚書右僕射刑部尚書檢校中書令永康縣公李靖爲兵部尚書右丞魏徵爲守祕書監叅預朝政夏四月辛巳太上皇徙居大安宮甲子太宗始於太極殿聽政五月周王元方薨六月戊寅以旱親錄囚徒遣長孫無忌房玄齡等祈雨於名山大川中書舍人杜正倫等往關內諸州慰撫又令文武官各上封事極言得失己卯大風折木秋八月己巳朔日有蝕之薛延陀遣使朝貢九月癸丑諸州置醫學冬十一月丙午西突厥高昌遣使朝貢庚申以并州都督李世勣爲通漢道行軍摠管兵部尚書李靖爲定襄道行軍摠管以擊厥突十二月戊辰突利可汗來奔癸未杜如晦以疾辭位許之癸丑詔建義已來交兵之處爲義士勇夫殞身戎陣者各立一寺命虞世南李伯藥褚亮顏師古岑文本許敬宗朱子奢等爲之碑銘以紀功業是歲戶部奏言中國人自塞外來歸及突厥前後內附開四夷爲州縣者男女一百二十餘萬口

唐書本紀卷第二

唐書本紀卷第三

劉 昫 等修

聞人詮校刻沈桐同校

太宗下

四年春正月乙亥定襄道行軍摠管李靖大破突厥獲隋皇后蕭氏及煬帝之孫正道送至京師癸巳武德殿北院火二日己亥幸溫湯甲辰李靖又破突厥于陰山頡利可汗輕騎遠遁丙午至自溫湯甲寅大赦賜酺五日民部尚書戴胄以本官檢校吏部尚書叅預朝政太常卿蕭瑀爲御史大夫與宰臣叅議朝政御史大夫西河郡公溫彥博爲中書令三月庚辰大同道行軍副摠管張寶相生擒頡利可汗獻於京師甲申尚書右僕射蔡國公杜如晦薨甲午以俘頡利告於太廟夏四月丁酉御順天門軍吏執頡利以獻捷自是西北諸蕃咸請上尊號爲天可汗於是降璽書冊命其君長則兼稱之秋七月甲子朔日有蝕之上謂房玄齡蕭瑀曰隋文何等主對曰克己復禮

勤勞思政每一坐朝或至日昃五品已上引之論事宿衛之人傳殮而食雖非性體仁明亦勵精之主也上曰公得其一未知其二此人性至察而心不明夫心暗則照有不通至察則多疑於物自以欺孤寡得之謂群下不可信任事皆自決雖勞神苦形未能盡合於理朝臣既知上意亦復不敢直言宰相已下承受而已朕意不然以天下之廣豈可獨斷一人之慮朕方選天下之才爲天下之務委任責成各盡其用庶幾於理也因令有司詔勅不便於時即宜執奏不得順旨施行八月丙午詔三品已上服紫五品已上服緋六品七品以綠八品九品以青婦人從夫色甲寅兵部尚書代國公李靖爲尚書左僕射九月庚午令收瘞長城之南骸骨仍令致祭壬午令自古明王聖帝賢臣烈士墳墓無得芻牧春秋致祭冬十月壬辰幸隴州曲赦隴岐二州給復一年十日校獵於貴泉谷十三日校獵於魚龍川自射鹿獻於大安宮甲子至自隴州戊寅制決罪人不得鞭背以明堂孔穴針灸之所兵部尚書侯岳集叅議朝政十二月辛亥開府儀同

三司淮安王神通薨甲寅高昌王麴文泰來朝是歲斷死刑二十九人幾致刑措東至于海南至于嶺皆外戶不閉行旅不齎糧焉五年正月癸酉大蒐於昆明池蕃夷君長咸從丙午親獻禽於大安宮己卯幸左藏庫賜三品已上帛任其輕重癸未朝集使請封禪己酉封皇弟元裕爲鄆王元名爲譙王靈夔爲魏王元祥爲許王元曉爲密王庚戌封皇子惛爲梁王貞爲漢王惲爲鄒王治爲晉王慎爲申王竄爲江王簡爲代王夏四月壬辰代王簡薨以金帛贖中國人因隋亂沒突厥者男女八萬人盡還其家屬六月甲寅太子少師新昌縣公李綱薨七月甲辰遣使毀高麗所立京觀收隋人骸骨祭而葬之戊申初令天下決死刑必三覆奏在京諸司五覆奏其日尚食進蔬食內教坊及太常不舉樂秋九月乙丑賜群官大射於武德殿冬十月右衛大將軍順州都督北平郡王阿史那什鉢苾卒十二月壬寅幸溫湯癸卯獵於驪山丙午賜新豐高年帛有差戊申至自溫湯六年春正月乙卯朔日有蝕之二月丙戌置三師官負戊子初置律

學三月戊辰幸九成宮六月己亥酈王元亨薨辛亥江王聿薨冬十月乙卯至自九成宮十二月辛未親錄囚徒歸死罪者二百九十人于家令明年秋末就刑其後應期畢至詔悉原之是歲党項羌前後內屬者三十萬口

七年春正月戊子詔曰宇文化及弟智及司馬德戡裴虔通孟景元禮楊覽唐奉義牛方裕元敏薛良馬舉元武達李孝本李孝質張愷許弘仁令狐行達席德方李覆等大業季年咸居列職或恩結一代在重一時乃包藏凶慝罔思忠義爰在江都遂行弑逆罪百閭趙釁深梟獍雖事是前代歲月已久而天下之惡古今同棄宜賞重典以勵臣節其子孫並宜禁錮勿令齒叙是日上製破陣樂舞圖辛丑賜京城酺三日丁卯雨土乙酉薛延陀遣使來朝庚寅秘書監檢校侍中魏徵爲侍中癸巳直太史將仕郎李淳風鑄渾天黃道儀奏之置於凝暉閣夏五月癸未幸九成宮八月山東河南三十州大水遣使賑恤冬十月庚申至自九成宮十一月丁丑頒新定五經壬辰開府儀

同三司齊國公長孫無忌爲司空十二月丙辰狩于少陵原詔以少牢祭杜如晦杜淹李綱之墓

八年正月癸未右衛大將軍阿史那吐苾卒辛丑右屯衛大將軍張士貴討東西五洞反獠平之壬寅命尚書右僕射李靖特進蕭瑀楊恭仁禮部尚書王珪御史大夫韋挺鄜州大都督府長史皇甫無逸楊州大都督府長史李襲譽幽州大都督府長史張亮涼州大都督李大亮右領軍大將軍竇誕太子左庶子杜正倫綿州刺史劉德威黃門侍郎趙弘智使于四方觀省風俗二月乙巳皇太子加元服丙午賜天下酺三日三月庚辰幸九成宮五月辛未朔日有蝕之丁丑上初服翼善冠貴臣服進德冠七月始以雲麾將軍階爲從三品隴右山崩大蛇屢見山東河南淮南大水遣使賑恤八月甲子有星孛于虛危歷于氐十一月上旬乃戒九月丁丑皇太子來朝冬十月右驍衛大將軍襲國公段志玄擊吐谷渾破之追奔八百餘里甲子至自九成宮十一月辛未右僕射代國公李靖以疾辭官授特進丁亥吐

谷渾寇源州已丑吐谷渾拘我行人趙道德十二月辛丑命持進李靖兵部尚書侯君集刑部尚書任城王道宗涼州都督李大亮等爲大揔管各帥師分道以討吐谷渾壬子越王泰爲雍州牧乙卯帝從太上皇閱武於城西是歲龜茲吐蕃高昌女國石國遣使朝貢

九年春三月洮州羌叛殺刺史孔長秀壬午大赦每鄉置長一人佐二人乙酉鹽澤道揔管高甌生大破叛羌之衆庚寅勅天下戶立三等未盡升降置爲九等夏四月壬寅康國獻獅子閏月丁卯日有蝕之癸巳大揔管李靖侯君集李大亮任城王道宗破吐谷渾於牛心堆五月乙未又破之於烏海追奔至烏海副揔管薛萬均薛萬徹又破之於赤水源獲其名王二十人庚子太上皇崩於大安宮壬子李靖平吐谷渾於西海之上獲其王慕容伏允以其子慕容順光降封爲西平郡王復其本國秋七月甲寅增修太廟爲六室冬十月庚寅葬高祖太武皇帝於獻陵戊申祔于太廟辛丑左僕射魏國公房玄齡加開府儀同三司餘如故十二月甲戌吐谷渾西平郡王慕容順

光爲其下所弑遣兵部尚書侯君集率師安撫之仍封順光子諾曷鉢爲河源郡王使統其衆右光祿大夫宋國公蕭瑀依舊特進復令叅預朝政

十年春正月壬子尚書左僕射房玄齡侍中魏徵上梁陳齊周隋五代史詔藏于秘閣癸丑徙封趙王元景爲荆王魯王元昌爲漢王鄭王元禮爲徐王徐王元嘉爲韓王荆王元則爲彭王滕王元懿爲鄭王吳王元軌爲霍王幽王元鳳爲號王陳王元慶爲道王魏王靈夔爲燕王蜀王恪爲吳王越王泰爲魏王燕王祐爲齊王梁王愔爲蜀王郯王暉爲蔣王漢王貞爲越王申王慎爲紀王夏六月以侍中魏徵爲特進仍知門下省事壬申中書令溫彥博爲尚書右僕射甲戌太常卿安德郡公楊師道爲侍中己卯皇后長孫氏崩于立政殿冬十一月庚寅葬文德皇后於昭陵十二月壬申吐谷渾河源郡王慕容諾曷鉢來朝乙亥親錄京師囚徒是歲關內河東疾病命醫齋藥療之

十一年春正月丁亥朔徙鄒王元裕爲鄧王譙王元名爲舒王癸巳
加魏王泰爲雍州牧左武侯大將軍庚子頒新律令於天下作飛山
宮甲寅房玄齡等進所修五禮詔所司行用之二月丁亥詔曰夫生
者天地之大德壽者修短之一期生有七尺之形壽以百齡爲限含
靈稟氣莫不同焉皆得之於自然不可以分外企也是以禮記云君
即位而爲禋莊周云勞我以形息我以死豈非聖人遠鑒通賢深識
末代已來明辟蓋寡靡不矜黃屋之尊慮白駒之過並多拘忌有慕
遐年謂雲車易乘羲輪可駐異軌同趣其蔽甚矣有隋之季海內橫
流豺狼肆暴吞噬黔首朕投袂發憤情深拯溺扶翼義師濟斯塗炭
賴蒼昊降鑒股肱宣力提劍指麾天下大定此朕之宿志於斯已畢
猶恐身後之日子子孫孫習於流俗猶循常禮加四重之櫬伐百祀
之木勞擾百姓崇厚陵今預爲此制務從儉約於九峻之山足容棺
而已積以歲月漸而備之木馬塗車土梓葦簫事合古典不爲時用
又佐命功臣或義深舟楫或謀定帷幄或身推行陣同濟艱危克成

鴻業追念在昔何日忘之使逝者無知咸歸寂寞若營魂有識還如
疇曩居止相望不亦善乎漢氏使將相陪陵又給以東園秘器篤終
之義恩意深厚古人豈異我哉自今已後功臣密戚及德業佐時者
如有薨亡宜賜塋地一所及以秘器使窆窆之時喪事無闕所司依
此營備稱朕意焉甲子幸洛陽宮命祭漢文帝三月丙戌朔日有蝕
之丁亥車駕至洛陽丙申改洛州爲洛陽宮辛亥大蒐於廣城澤癸
丑還宮夏四月甲子震乾元殿前槐樹丙寅詔河北淮南舉孝悌淳
篤兼閑時務儒術該通可爲師範文辭秀美才堪著述明識政體可
委字人并志行修立爲鄉閭所推者給傳詣洛陽宮六月甲寅尚書
右僕射虞國公溫彥博薨丁巳幸明德宮己未定制諸王爲世封刺
史戊辰定制勲臣爲世封刺史改封任城王道宗爲江夏郡王趙郡
王孝恭爲河間郡王己巳改封許王元祥爲江王秋七月癸未大霽
雨穀水溢入洛陽宮深四尺壞左掖門毀宮寺十九所洛水溢漂六
百家庚寅詔以災命百官上封事極言得失丁酉車駕還宮壬寅廢

明德宮及飛山宮之玄圃院分給遣水之家仍賜帛有恙丙午脩老君廟於亳州宣尼廟於兗州各給二十戶享祀焉涼武昭王復近墓二十戶充守衛仍禁芻牧樵採九月丁亥河溢壞陝西河北縣毀河陽中潭幸白司馬坂以觀之賜遭水之家粟帛有差冬十二月辛卯幸懷州乙未狩于濟源丙午車駕還宮十二月辛酉百濟王遣其太子隆來朝

十二年春正月乙未吏部尚書高士廉等上氏族志一百三十卷壬寅松叢二州地震壞人廬舍有壓死者二月乙卯車駕還京癸亥觀砥柱勒銘以紀功德甲子夜郎獠反夔州都督齊善行討平之乙丑次陝州自新橋幸河北縣祀夏禹廟丁卯次柳谷頓觀鹽池戊寅以隋鷹揚郎將堯君素忠於本朝贈蒲州刺史仍錄其子孫閏二月庚辰朔日有蝕之丙戌至自洛陽宮夏五月壬申銀青光祿大夫永興縣公虞世南卒六月庚子初置玄武門左右飛騎秋七月癸酉吏部尚書申國公高士廉爲尚書右僕射冬十月乙卯狩于始平賜高年

粟帛有老乙未至自始平己亥百濟遣使貢金甲雕斧十二月辛巳
右武侯將軍上官懷仁大破山獠於壁州

十三年春正月乙巳朔謁獻陵曲赦三原縣及行從大辟罪丁未至
自獻陵戊午加房玄齡爲太子少師二月丙子停世襲刺史三月乙
丑有星孛于畢昴夏四月戊寅幸九成宮甲申阿史那結社爾犯御
營伏誅壬寅雲陽石燃者方丈晝如灰夜則有光投草木於上則焚
歷年而止自去冬不雨至于五月甲寅避正殿令五品以上上封事
減膳罷役分使賑恤申理冤屈乃雨六月丙申封皇弟元嬰爲滕王
秋八月辛未朔日有蝕之庚辰立右武侯大將軍化州都督懷化郡
王李思摩爲突厥可汗率所部建牙于河北冬十月甲申至自九成
宮十一月辛亥侍中安德郡公楊師道爲中書令十二月丁丑吏部
尚書陳國公侯君集爲交河道行軍大摠管帥師伐高昌乙亥封皇
子福爲趙王壬午嶺州都督王志遠有罪伏誅詔於洛相幽徐齊并
秦蒲等州並置常平倉己丑吐谷渾河源郡王慕容諾曷鉢來逆女

壬辰狩于咸陽是歲滁州言野蠶食柰菜成繭大如柰其色綠凡六千五百七十碩高麗新羅西突厥吐火羅康國安國波斯踈勒于闐焉耆高昌林邑昆明及荒服蠻酋相次遣使朝貢

十四年春正月庚子初命有司讀時令甲寅幸魏王泰宅赦雍州及長安獄大辟罪已下二月丁丑幸國子學觀釋奠赦大理萬年繫囚國子祭酒以下及學生高第精勤者加一級賜帛有差庚辰左驍衛將軍淮陽王道明送弘化公主歸于吐谷渾壬午幸溫湯辛卯至自溫湯乙未詔以梁皇侃褚仲都周熊安生沈重陳沈文阿周弘正張機隋何妥劉焯劉炫等前代名儒學徒多行其義命求其後三月戊午置寧朔大使以護突厥夏五月壬戌徙封燕王靈夔爲魯王六月乙酉大風拔木己丑薛延陀遣使求婚己未滁州野蠶成繭凡收八千三百碩八月庚午新作襄城宮癸巳交河道行軍大摠管侯君集平高昌以其地置西州九月癸卯曲赦西州大辟罪乙卯於西州置安西都護府冬十月己卯詔以贈司空河間元王孝恭贈陝東道大

行臺尚書右僕射鄭節公殷開山贈民部尚書渝襄公劉政會等配饗高祖廟庭閏月乙未幸同州甲辰狩于堯山庚戌至自同州丙辰吐蕃遣使獻黃金器千斤以求婚十一月甲子朔日南至有事于圓丘十二月丁酉交河道旋師吏部尚書陳國公侯君集執高昌王麴智盛獻捷于觀德殿行飲至之禮賜酺三日乙卯高麗世子相權來朝

十五年春正月丁卯吐蕃遣其國相祿東贊來逆女丁丑禮部尚書江夏王道宗送文成公主歸吐蕃辛巳幸洛陽宮三月戊申幸襄城宮庚午發襄城宮夏四月辛卯詔以來年二月有事太山所司詳定儀制五月壬申并州僧道及老人等抗表以太原王業所因明年登封已後願時臨幸上於武成殿賜宴因從容謂侍臣曰朕少在太原喜羣聚博戲暑往寒逝將三十年矣時會中有舊識上者相與道舊以爲笑樂因謂之曰他人之言或有面諛公等朕之故人實以告朕即日政教於百姓何如人間得無疾苦耶皆奏即日四海太平百姓

歡樂陛下力也臣等餘年日惜一日但眷戀聖化不知疾苦因固請
過并州上謂曰飛鳥過故鄉猶躑躅徘徊況朕於太原起義遂定天
下復少小遊觀誠所不忘岱禮若畢或冀與公等相見於是賜物各
有差丙子百濟王扶餘璋卒詔立其世子扶餘義慈嗣其父位仍封
爲帶方郡王六月戊申詔天下諸州舉學綜古今及孝悌淳篤文章
秀異者並以來年二月摠集泰山己酉有星孛于太微犯卽位丙辰
停封泰山避正殿以思咎命食減膳秋七月甲戌孛星滅冬十月辛
卯大閱於伊闕壬辰幸嵩陽辛丑還宮十一月壬戌廢鄉長壬申還
京師癸酉薛延陀以同羅僕骨迴紇靺鞨靺之衆度漠屯于白道川
命營州都督張儉統所部兵厭其東境兵部尚書李勣爲朔方行軍
摠管右衛大將軍李大亮靈州道行軍摠管涼州都督李襲譽爲涼
州道行軍摠管分道以禦之十二月戊子朔至自洛陽宮甲辰李勣
及薛延陀戰于諾真水大破之斬首三千餘級獲馬萬五千匹薛延
陀跳身而遁勣旋破突厥思結於五臺縣虜其男女千餘口獲羊馬

稱是

十六年春正月辛未詔在京及諸州死罪囚徒配西州爲戶流人未達前所者徙防西州兼中書侍郎江陵子岑文本爲中書侍郎專知機密夏六月辛卯詔復隱王建成曰隱太子改封海陵刺王元吉曰巢刺王秋七月戊午司空趙國公無忌爲司徒尚書左僕射梁國公玄齡爲司空九月丁巳特進鄭國公魏徵爲太子太師知門下省事如故冬十一月丙辰狩于岐山辛酉使祭隋文帝陵丁卯宴武功士女於慶善宮南門酒酣上與父老等涕泣論舊事老人等遞起爲舞爭上萬歲壽上各盡一杯庚午至自岐州十二月癸卯幸溫湯甲辰狩于驪山時陰寒晦冥圍兵斷絕上乘高望見之欲捨其罰恐虧軍令乃迴轡入谷以避之是歲高麗大臣蓋蘇文弑其君高武而立武兄子藏爲王

十七年春正月戊辰右衛將軍代州都督劉蘭謀反腰斬太子太師鄭國公魏徵薨戊申詔圖畫司徒趙國公無忌等勲臣二十四人於

凌煙閣三月丙辰齊州都督齊王祐長史權萬紀典軍韋文振據齊州自守詔兵部尚書李勣刑部尚書劉德威發兵討之兵未至兵曹杜行敏執之而降遂賜死于內侍省丁巳樊惑守心前星十九日而退夏四月庚辰朔皇太子有罪廢爲庶人漢王元昌吏部尚書侯君集並坐與連謀伏誅丙戌立晉王治爲皇太子大赦賜酺三日丁亥中書令楊師道爲吏部尚書己丑加司徒趙國公長孫無忌太子太師司空梁國公房玄齡太子太傅特進宋國公蕭瑀太子太保兵部尚書英國公李勣爲太子詹事仍同中書門下三品庚寅上親謁太廟以謝承乾之過癸巳魏王泰以罪降爵爲東萊郡王五月乙丑手詔舉孝廉茂才異能之士六月己卯朔日有蝕之壬午改葬隋恭帝丁酉尚書右僕射高士廉請致仕詔以爲開府儀同三司同中書門下三品閏日戊午薛延陀遣其兄子突利設獻馬五萬匹牛駝一萬羊十萬以請婚許之丙子徙封東萊郡王泰爲順陽王秋七月庚辰京城訛言云卜遣帳帳取人心肝以祠天狗遞相驚悚上遣使遍加宣諭

月餘乃止丁酉司空太子太傅梁國公房玄齡以母憂罷職八月工部尚書鄧國公張亮爲刑部尚書叅預朝政九月癸未徙庶人承乾于黔州冬十月丁巳房玄齡起復本職十一月己卯有事于南郊壬午賜天下酺三日以涼州獲瑞石曲赦涼州并錄京城及諸州繫囚多所原宥

十八年春正月壬寅幸溫湯夏四月辛亥幸九成宮秋八月甲子至自九成宮丁卯散騎常侍清苑男劉洎爲侍中中書侍郎江陵子岑文本中書侍郎馬周並爲中書令九月黃門侍郎褚遂良叅預朝政冬十月辛丑朔日有蝕之甲辰初置太子司議郎官員甲寅幸洛陽宮安西都護郭孝恪帥師滅焉耆執其王突騎支送行在所十一月壬寅車駕至洛陽宮庚子命太子詹事英國公李勣爲遼東道行軍摠管出柳城禮部尚書江夏郡王道宗副之刑部尚書鄧國公張亮爲平壤道行軍摠管以舟師出萊州左領軍常何瀘州都督左難當副之發天下甲士召募十萬並趣平壤以伐高麗十二月辛丑庶人

承乾死

十九年春二月庚戌上親統六軍發洛陽乙卯詔皇太子留定州監國開府儀同三司申國公高士廉攝太子太傅與侍中劉洎中書令馬周太子少詹事張行成太子右庶子高季輔五人同掌機務以吏部尚書安德郡公楊師道爲中書令贈殷比干爲太師謚曰忠烈命所司封墓葺祠堂春秋祠以少牢上自爲文以祭之三月壬辰上發定州以司徒太子太師兼檢校侍中趙國公長孫無忌中書令岑文本楊師道從夏四月癸卯誓師於幽州城南因大饗六軍以遣之丁未中書令岑文本卒于師癸亥遼東道行軍大總管英國公李世勣會攻蓋牟城破之五月丁丑車駕渡遼甲申上親率鐵騎與李世勣會圍遼東城因烈風發火弩斯須城上屋及樓皆盡麾戰士令登乃拔之六月丙辰師至安市城丁巳高麗別將高延壽高惠真帥兵十五萬來援安市以拒王師李世勣亟立奮擊上自高峯引軍臨之高麗大潰殺獲不可勝紀延壽等以其衆降因名所幸山爲駐蹕山刻石紀

功焉賜天下大酺二日秋七月李世勣進軍攻安市城至九月不剋乃班師冬十月丙辰入臨渝關皇太子自定州迎謁戊午次漢武臺刻石以紀功德十一月辛未幸幽州癸酉大饗還師十二月戊申幸并州侍中清苑男劉洎以罪賜死是歲薛延陀真珠毗伽可汗死二十年正月上在并州丁丑遣大理卿孫伏伽黃門侍郎褚遂良等二十二人以六條巡察四方黜陟官吏庚辰曲赦并州宴從官及起義元從賜粟帛給復有差三月己巳車駕至京師己丑刑部尚書鄭國公張亮謀反誅閏月癸巳朔日有蝕之夏四月甲子太子太師趙國公長孫無忌太子太傅梁國公房玄齡太子太保宋國公蕭瑀各辭調護之職詔許之六月遣兵部尚書固安公崔敦禮特進英國公李世勣擊破薛延陀於鬱督軍山北前後斬首五千餘級虜男女三萬餘人秋八月甲子封皇孫爲陳王己巳幸靈州庚午次涇陽頓鐵勒迴紇拔野古同羅僕骨多濫葛思結阿跌契苾跌結渾斛薛等十一姓各遣使朝貢奏稱延陀可汗不事大國部落烏散不知所之奴

等各有分地不能逐延陟去歸命天子乞置漢官詔遣會靈州九月甲辰鐵勒諸部落侯斤頡利發等遣使相繼而至靈州者數千人來貢方物因請置吏咸請至尊爲可汗於是北荒悉平爲五言詩勒石以序其事辛亥靈州地震有聲冬十月前太子太保宋國公蕭瑀貶商州刺史丙戌至自靈州

二十一年春正月壬辰開府儀同三司申國公高士廉薨丁酉詔以來年二月有事泰山甲寅賜京師酺三日二月壬申詔以左丘明卜子夏公羊高穀梁赤伏勝高堂生戴聖毛萇孔安國劉向鄭衆杜子春馬融盧植鄭康成服子慎何休王肅王輔嗣杜元凱范甯等二十一人代用其書垂於國胄自今有事於太學並命配享宣尼廟堂丁丑皇太子於國學釋菜夏四月乙丑營太和宮於鍾南之上改爲翠微宮五月戊子幸翠微宮六月癸亥司徒趙國公無忌加授揚州都督秋七月庚子建玉華宮於宜君縣之鳳凰谷庚戌至自翠微宮八月壬戌詔以河北大水停封禪辛未骨利幹國遣使貢名馬丁酉封皇子

明爲曹王冬十一月癸卯徙封順陽王泰爲濮王十二月戊寅左驍衛大將軍阿史那社爾右驍衛大將軍契苾何力安西都護郭孝恪司農卿楊弘禮爲崑山道行軍大摠管以伐龜茲是歲墮婆登乙利鼻林送都播干同石波斯康國吐火羅阿悉吉等遠夷十九國並遣使朝貢又於突厥之北至于迴紇部落置驛六十六所以通北荒焉二十二年春正月庚寅中書令馬周卒司徒趙國公無忌兼檢校中書令知中書誥下二省事己亥刑部侍郎崔仁師爲中書侍郎叅知機務戊戌幸溫湯戊申還宮二月前黃門侍郎褚遂良起復黃門侍郎中書侍郎崔仁師除名配流連州癸丑西番沙鉢羅葉護率衆歸附以其侯斤屈裴祿爲忠武將軍兼大侯斤戊午以結骨部置堅昆都督乙亥幸玉華宮乙卯賜所經高年篤疾粟帛有差乙卯蒐于華原四月甲寅磧外蕃人爭牧馬出界上親臨斷決然後咸服丁巳右武候將軍梁建萬擊松外蠻下其部落七十二所五月庚子右衛長史王玄策擊帝那伏帝國大破之獲其王阿羅那順及王妃子等虜男

女萬二千人牛馬二萬餘以詣闕使方士那羅邇娑婆於金殿門造
延年之藥吐蕃贊普擊破中天竺國遣使獻捷六月癸酉特進宋國
公蕭瑀薨秋七月癸卯司空梁國公房玄齡薨八月己酉朔日有蝕
之九月己亥黃門侍郎褚遂良爲中書令十月癸亥至自玉華宮十
一月戊戌眉卬雅三州獠反右衛將軍梁建方討平之庚子契丹帥
寇哥奚帥可度者並率其部內屬以契丹部爲松漠都督以奚部置
饒樂都督十二月乙卯增置殿中侍御史監察御史各二員大理寺
置平事十員閏月丁丑朔崑山道摠管阿史那社爾降處密處月破
龜茲大撥等五十城虜數萬口執龜茲王訶黎布失畢以歸龜茲平
西域震駭副將薛萬徹脅于闐王伏闕信入朝癸未新羅王遣其相
伊贊千金春秋及其子文王來朝是歲新羅女王金善德死遣冊立
其妹眞德爲新羅王

二十三年春正月辛亥倂龜茲王訶黎布失畢及其相那利等獻于
社廟二月丙戌置瑤池都督府隸安西都護府丁亥西突厥肆葉護

可汗遣使來朝三月丙辰置鄆州都督府自去冬不雨至于此月已未乃雨辛酉大赦丁卯勅皇太子於金液門聽政是月日赤無光四月己亥幸翠微宮五月戊午太子詹事英國公李世勣爲疊州都督辛酉開府儀同三司衛國公李靖薨已巳上崩於含風殿年五十二遺詔皇太子即位於柩前喪紀宜用漢制秘不發喪庚午遣舊將統飛騎勁兵從皇太子先還京發六府甲士四千人分列於道及安化門翼從乃入大行御馬輿從官侍御如常壬申發喪六月甲戌朔殯于太極殿八月丙子百寮上謚曰文皇帝廟號太宗庚寅葬昭陵上元元年八月改上尊號曰文武聖皇帝天寶十二載二月改上尊號爲文武大聖大廣孝皇帝

史臣曰臣觀文皇帝發迹多奇聰明神武拔人物則不私於黨負志業則咸盡其才所以屈突尉遲由仇敵而願傾心膂馬周劉洎自疎遠而卒委鈞衡終平泰階諒由斯道嘗試論之礎潤雲興蟲鳴螽躍雖堯舜之聖不能用禱机窮奇而治平伊呂之賢不能爲夏桀殷辛

而昌盛君臣之際遭遇斯難以至抉目剖心蟲流筋擢良由遭值之異也以房魏之智不踰于丘軻遂能尊主庇民者遭時也或曰以太宗之賢失愛於昆弟失教於諸子何也曰然舜不能仁四罪堯不能訓丹朱斯前志也當神堯任讒之年建成忌功之日苟除畏偏孰顧分崩變故之興間不容髮方懼毀巢之禍寧虞尺布之謠承乾之愚聖父不能移也若文皇自定儲於哲嗣不騁志於高麗用人如貞觀之初納諫比魏徵之日況周發周成之世襲我有遺妍較漢文漢武之恢弘彼多慙德迹其聽斷不惑從善如流千載可稱一人而已贊曰昌發啓國一門三聖文定高位友于不令管蔡既誅成康道正貞觀之風到今歌詠

唐書本紀卷第三